

ILAY FANALAHIDY

HO AN'ILAY VARAVARANA

 Tombontsoa iray ny tonga eto amin'ny tabernakla! Ilay izy dia tsy nampoizina kely ho ahy, ihany koa. Izaho, eo am-pahafantarana fa izao hariva izao dia harivan'ny fandraisana, dia tiako foana, raha eto amin'ny manodidina aho na aiza na aiza, ny ho tonga amin'ny fandraisana. Satria izany dia... Heveriko fa ny Kristiana rehetra dia tokony hiandry ny fanaovana ny fandraisana, satria hoy Jesosy hoe, "Raha tsy mihinana an'izany ianareo, dia tsy manana anjara Amiko." Noho izany, izany dia ny...tombontsoa iray lehibe foana ny—ny tonga ato amin'ny tabernakla. Koa, izao hariva izao, nilaza i Rahalahy Neville fa tratry ny aretin-tenda kely fotsiny izy, ary—ary tiany raha izaho no hiresaka amin'ny fiangonantsika. Nilaza taminy aho fa ho faly aho ny hanao an'izany. Tiako ihany koa ny hilaza fa raha...

² Rahampitso hariva dia ny fivorian'ny lehilahy, ireo mpitantan-draharaha, rahampitso hariva, ary ireo mpandraharaha eto amin'ny fiangonana, eo amin'ny fivorian'izy ireo mahazatra isaky ny Alatsinainy hariva sy ny...dia manana fanapahan-kevitra ho raisina miaraka amin'ny mpiantoka. Heveriko fa ianareo rehetra dia mahazo fa ny—ny—ny taratasintsika dia nivoaka, ary afaka hanorina ny fiangonana isika. Ary noho izany dia mandeha ilay izy, ary angamba hanomboka amin'ity herinandro ity. Hanomboka amin'ity herinandro ity ny fiangonana, araka ny fantatro. Fa nolavin'izy ireo izahay teo amin'izany, teto Jeffersonville. Saingy nandeha tany Indianapolis izahay, ilay fanjakana, ary izy ireo no nanome anay ny fahazoan-dàlana, noho izany dia hanorina azy isika. Ary noho izany dia hanomboka ilay izy, angamba, amin'ity herinandro ity. Hampahafantarina izany aorian'ny fivoriana rahampitso hariva. Ary avy eo aorian'ny fivoriana rahampitso hariva, raha tsy hanomboka amin'ity herinandro ity izy ireo, raha misy zavatra mitranga, ka tsy afaka manomboka amin'ity herinandro ity ilay mpiantoka, dia hanomboka amin'ny herinandro manaraka izy amin'izay fotoana izay.

³ Ary amin'ity herinandro ho avy ity, ny Sabotsy hariva, ny Alahady maraina sy ny Alahady hariva, an'ny herinandro manaraka, amin'ity Sabotsy sy Alahady ho avy ity, raha sitrakny Tompo, dia tiako ny hanana fi—fi—fivoriana telo sosona, indray, tahaka ny nataontsika herinandro vitsy lasa izay. Ary avy eo isika rehefa avy... Izany dia ho ny Sabotsy hariva, ary avy eo ny Alahady maraina, ary avy eo ny Alahady hariva. Ity

manaraka ity, izany dia ho ny fahatelo ambin'ny folo sy ny fahefatra ambin'ny folon'ity volana ity.

⁴ Ary avy eo izaho sy ny sasany amin'ireo rahalahy dia handeha aorian'izany fotoana izany, hankany Colorado any, eo amin'ny dia fihazana iray, avy eo dia miverina. Raha ny tabernakla, rehefa vita ilay izy, raha izany no sitraky ny Tompo, dia tiako ny haka, angamba, herinandro manontolo alohan'ny handehanako ao amin'ireo favoriana indray, ka hanana *Ny Tombokase Fito* an'ny Apokalypsy. Mialoha mihitsy... Tahaka ny nananantsika *Ny Taona Fiton'ny Fiangonana*, ankehitriny *Ny Tombokase Fito* no manaraka an'Izany.

⁵ Ary angamba eo amin'ny roa na telo herinandro manaraka eo, satria mihevitra aho fa nilaza izy ireo hoe izy ireo, miaraka amin'ireo lehilahy izay hametrahany an'izany, izy ireo dia afaka, isika dia afaka manorina ny tabernakla ary hanana an'izany eo amin'ny folo andro eo, na dimy ambin'ny folo, zavatra tahaka an'izany. Noho izany isika dia hanana efitra misy toerana eo amin'ny indroa amin'ny olona ananantsika eto, na intelo, angamba olona mihoatra. Ary toy izany no niandrasako mandrapahatongan'izany fotoana izany.

⁶ Satria, tamin'ny Sabotsy sy Alahady lasa, dia nampahatahotra izany, fantatrareo. Nitsangana teto ny olona tamin'ny roa ora tolakandro, mba hameno ny tabernakla, talohan'ny hany nisokafan'ny fiangonana. Ny ampitso maraina, tamin'ny dimy ora, mpampivelona iray izay mipetraka eo akaikiko, no tonga avy tany, nanao hoe, "Hipoka olona fotsiny nanerana ny tabernakla tamin'ny dimy ora maraina." Noho izany, ary amin'izay fotoana izay ireo olona, rehefa miditra izy ireo, ka tsy misy toerana, dia kivy ary lasa mandeha. Ary—ary ireo izay mitsangana amin'izay fotoana izay, dia mitambatra sy mifanety eny amin'ny lâlantsara, mahatsapa ho nivonkina hozatra tanteraka izy ireo, sy ny sisa. Ary mahita vehivavy mitsangana eo aho, tsemboka, fantatrareo, tahaka an'izany, ary ny hatsebohana miraraka eo amin'izy ireo. Ary lehilahy iray miala ka manome ny, sezà ho an'ny vehivavy iray; ary avy eo dia hitsangana izy mandra-pahararin'ny ranjony, ary olona hafa no hanome ho azy. Fantatrareo, ary tahaka an'izany, fa mampalahelo ilay izy, ary ireo reny miaraka amin'ny zanany kely marary sy ny sisa, mampalahelo izany.

⁷ Noho izany, dia miezaka izahay ny hanafoana an'izany ankehitriny amin'ny alàlan'ny fanorenana tabernakla iray goavana kokoa. Ary isika dia hanana toerana tsara izay ireo ankizy, indraindray... ary manelingelina, ohatra ireo ankizy kely izay mitomany; eny, hanana efitra ho an'izany isika, noho izany ireo reny dia afaka miditra ao, mbola mahita ny favoriana foana, ary hampita feo mihitsy ao amin'ilay efitra. Ary hanana efitra ho an'ny sekoly Alahady isika ka ny zavatra rehetra dia voalahatra fotsiny araka ny tokony ho izy. Ary izany, raha

sitraky ny Tompo, dia miseho, ho tonga amin'io herinandro ho avy io.

⁸ Nandatsa-bato ho an'izany zato isan-jato ianareo rehetra, noho izany dia nifikitra teo amin'izany mihitsy izahay, hitanareo. Masi-mandidy ny fiangonana. Izay lazain'ny fiangonana, dia izay no izy. Ireo mpitantan-draharaha na tsy misy olon-kafa... Ireo mpitantan-draharaha fotsiny dia, ny tsirairay, latsa-bato iray. Ny pasitera dia latsa-bato anankiray fotsiny. Ilay izy dia ny fiangonana, izany dia—demokrasian'ny fiangonana izany, ny fahamasi-mandidin'ny fiangonana. Ny fiangonana, ao amin'ny manontolo, no miteny. Izay ihany. Ary tiantsika izany, satria isika dia tsy manana eveka na laharamboninahitra na mpanara-maso ambony na ny sisa mba hiteny amintsika an'ity, itsy, na ny hafa. Ilay izy dia ny Fanahy Masina ao amin'ny fiangonana, no manao ny fitenenana. Tiako izany fitsipika izany, ary tena tsara izany.

⁹ Fa nanontany aho hoe, “Tianareo rehetra ve ny hiandry mandra-pahazoantsika ny ampy hamindrana ny tabernakla ka hanorina fiangonana goavana anankiray?” Teo amin’ny komitin’ny mpitantan-draharaha izany, fa tsy nety voalamin’ireo mpitantan-draharaha. Ary noho izany dia nanontany ahy izy ireo, amin’ny maha-mpanara-maso ambony, mba ho tonga ka hanontany ny fiangonana. Noho izany dia hoy aho hoe, “Ankehitriny isika dia manana vola ampy hanitarana ny haben’ny fiangonana ary hanamboatra azy rehetra ho hafa, sy ny rehetra, noho izay nananantsika.” Hoy aho hoe, “Afaka manao an'izany avy hatrany isika ankehitriny, raha tsy izany dia hanangona ny volantsika mandra-pahazoantsika ampy hanorenana ny fiangonana manontolo, vaovao, any amin’ny toerana hafa.”

¹⁰ Ary nanao latsa-bato teo amin'izany isika tato ampiangonana, ary tamin’ny fifanarahana no nandatsaham-bato ny amin’ny “hanorina fiangonana izao ankehitriny izao, ary izany dia hanorina fiangonana lehibe kokoa izao ankehitriny izao.” Ary nijanona tamin’izany mihitsy isika.

¹¹ Ary ny komity teto Jeffersonville dia nandà anay, nilaza fa tsy afaka manao an'izany izahay. Ary nialanay izany, ka nandeha tany Indianapolis izahay ary nametraka an'izany teo amin’ny Fanjakana. Ary noho izany dia nandefa teny izy ireo, hoe, “mandrosoa,” manana ny alàlana isika hanorina an'ilay izy. Koa noho izany dia tsy misy idiran’ny tanàna amin'izany ankehitriny, ny Fanjakana no tokony hisahana azy. Koa noho izany dia manana ny fahazoan-dàlana isika, ary ny mpiantoka dia manana an'ilay—an'ilay fahazoan-dàlana eny an-tànany izao ankehitriny izao, ary manantena aho fa efa vonona izy ireo ny hanomboka amin’ny fotoana rehetra.

¹² Amin'io rahampitso hariva io, raha ilay—raha milaza ilay mpiantoka fa te-hanomboka amin'ny herinandro manaraka izy, amin'izay fotoana izay dia hanajanona an'ireo fivoriana fotsiny aho ho an'ny... mandra-pahatongantsika ao amin'*Ny Tombokase Fito*. Ary noho izany raha tsy afaka manomboka amin'ny herinandro manaraka ilay mpiantoka, amin'izay fotoana izay ny Alahady manaraka, ny Sabotsy sy ny Alahady, dia hanana ny fivoriana aho alohan'ny handehanana.

¹³ Koa noho izany dia saika hanana an'izany aho tamin'ity Alahady ity, ary avy eo dia hitako fa izao hariva izao dia harivan'ny fandraisana, noho izany dia najanoko izany amin'ity Alahady ity. Satria, vahoaka marobe tahaka an'izao, dia tsy afaka manao ny fandraisana miadana tsara ianareo, fa amin'izay fotoana izay rehefa manana an'ilay fiangonana goavana kokoa isika dia afaka.

¹⁴ Ankehitriny, manana Filoha iray ho avy isika. Ny... oh, fantatrareo izay tiako ho lazaina, vao avy natolotra ny fianakaviana Hickerson izany vao tsy ela akory izay. Ary ny anabavintsika izay mpitendry piano, raha ho avy izy ka hanome antsika naoty kely eo amin'ny piano, an'ny "Ento Izy Ireo," raha sitrakao, na hira kely iray amin'izany karazany izany. Ity lehilahy mihaja kely ao amin'ny fianakaviana Hickerson ity, izay efa nandrasana ela be, dia tonga. Zaza kely tsara tarehy, ary azo antoka fa firavaka iray ho an'ireo Hickerson izy. Ary firavaka ho antsika izy rehetra ireo, tantsika izy ireo ary rahalahintsika sy anabavintsika marina tokoa. Mankasitraka isika ny manana an'ity anankiray teraka tao amin'ny fianakavian'izy ireo ity, izay nanova an'ilay fianakaviana tanteraka tokoa. Ary raha izy ireo, ray sy reny no hitondra an'io zaza kely io ankehitriny ho an'ny fanolorana. Ankehitriny, hoy ny Soratra hoe, "Nentin'izy ireo teo Aminy ireo ankizy, zaza, mba Ahafahany mametraka ny Tànanay eo amin'izy ireo sy mitso-drano azy."

¹⁵ Ankehitriny, misy ireo olona eto amin'izao tontolo izao izay mino an'izay antsoin'izy ireo hoe "batisan-jaza." Ary, izany dia, maka an'ireo ankizy kely izy ireo fa tsy manao batisa azy ireo mihitsy, satria, izy ireo dia mamafy rano eo amin'izy ireo fotsiny. Ankehitriny, tsy mahita an'izany na aiza na aiza ao amin'ny Baiboly isika, izay mba namafazaran'izy ireo olona iray, olon-dehibe, avelao hipetraka tsara ireo ankizy.

¹⁶ Ary noho izany ny batisa dia fiaikena iray izay nataon'ny asa iray an'ny fahasoavana ao anaty. Ary ny zaza kely dia tsy manana fahalalana ny fahotana. Noho izany, rehefa maty teo amin'ny hazo fijaliana Jesosy, dia maty Izy mba hanaisotra ny fahotan'izao tontolo izao. Ary rehefa lasa olombelona iray ny zazakely, ka teraka teto amin'izao tontolo izao, dia tsy manana ny fahotany manokana izy ireo, noho izany dia tsy manana fibebahana hatao izy ireo. Fa, rehefa io, ny Ràn'i Jesosy Kristy no manaisotra an'io fahotana io. Mazava ho azy, teraka tao amin'ny

ota ny zazakely, notorotoronina tao amin'ny heloka, tonga eto amin'izao tontolo izao miteny lainga, ary mpanota ara-natiora izy ireo, fa ny Ràn'i Jesosy Kristy no manao fanavotana ho an'izany. Saingy rehefa tonga eo amin'ny taonan'ny andraikitra ilay zazakely, ary mahafantatra an'izay tsara sy ratsy, amin'izay fotoana izay izy dia tokony hibebaka tamin'izay nataony. Ny fahotany ankehitriny dia ilay fahotana tahaka ny nahaterahany tao amin'ny fahotana mihitsy, ny fahotan'olona izany, ny fahotana ankehitriny dia ilay fahotana izay nataon'ny Adama sy Eva; ary navelan'Andriamanitra izany, tamin'ny alàlan'ny Ràn'i Jesosy Kristy. Ankehitriny ny zazakely dia tsy manana fahotana hibebahana mandra-pahatonga azy hanota, amin'izay fotoana izay izy vao tokony hibebaka. Hitanareo? Ary rehefa mibebaka izy, amin'izay fotoana izay no fotoana hanaovana batisa, ary avy eo dia atao batisa amin'ny fanitrihana izy.

¹⁷ Mandra-pahatongan'io fotoana io, dia manaraka ny torohetivry ny Baiboly isika, izany hoe, "Nentin'izy ireo teo amin'i Jesosy ireo ankizy kely, mba Ahafahany mametraka ny Tànany eo amin'izy ireo ka mitso-drano azy." Ity raiamandreny maha-te-ho tia ity izao hariva izao dia mitondra an'ity zaza kely ity eto amiko sy ny pasitera, ho an'ny fanolorana. Ary mahatsapa izy ireo fa ny fametrahana azy eo amin'ireo tânán'ireo solontenan'i Kristy, dia mametraka an'izany eo antânán'i Kristy izy ireo. Noho izany, amin'ny finoana, dia entinay eo amin'Andriamanitra ilay zazakely, mba hanome ny saotra nohon'ny nitondrana azy teto, ary mangataka amin'Andriamanitra mba hitso-drano azy, izany no antsointsika hoe "fanoloran-jaza."

¹⁸ Ankehitriny, fantatrareo ny hataoko mikasika an'ireo zanako manokana. Manana zazavavy kely iray aho any amin'ny Voninahitra izao hariva izao, ary voatolotra an'ny Tompo izy, teto amin'ny alitara. Manana zazalahy sy zazavavy kely aho mipetraka ery aorianea ery, izao hariva izao, izay tsy mbola natao batisa mihitsy. Ny anankiray, iraika ambin'ny folo taona, efa niresaka taminy aho mikasika an'izany androany, Sarah, ny amin'ny batisa. Ary Joseph dia vao fito taona fotsiny, noho izany dia mbola tanora loatra izy ny amin'izany, mandra-paha... Raha maniry an'izany izy, ary milaza fa Andriamanitra no nametraka an'izany tao am-pony, dia hataoko izy amin'izay fotoana izay. Saingy, amin'ny maha-zaza, dia natolotro an'ny Tompo fotsiny izy ireo, satria izany no fampianarana ara-tSoratra an'izany.

¹⁹ Rahalahy Neville, raha handroso miaraka amiko ianao ankehitriny ho an'ity tovolahy tsara tarehy ity. [Manatona an-dRahalahy sy Ranabavy Hickerson Rahalahy Branham—Mpand.] Natahotra aho... Hollin ve io? Hollin? Hia, Hollin, Junior. Stephen Hollin. Eny, tsara izany. Oh, nieritreritra aho hoe natory izy. Izany ilay natioran-dry Hickerson, ny zavatra rehetra izay miseho. Nahita azy aho indray andro, hoy aho hoe

“ny Filoha,” sy ny sisa. Ary, mazava ho azy, kely loatra izany ho azy, hitanareo, ny miresaka ny aminy amin’ny maha- “Filoha.” Manao ahoana ianao? Eny, fantattro fa tsy maintsy ho harena iray ho an’ny reny masina anankiray ity. Tsy mieritreritra toy izany koa ve ianareo? Tena mamy. Ary ankehitriny, Rahalahy Hickerson sy Ranabavy Hickerson, amin’ny maha-mpanompon’i Kristy, amin’ny maha-pasiteranareo, dia entiko ity zazakely ity, amin’ny finoana, ho eo an-tsandrini Jesosy Kristy, Izay irianareo hametrahana azy eo an-tSandriny.

²⁰ Ndao isika hanondrika ny lohantsika raha mitsangana eto izaho sy ny pasitera miaraka amin’ny tanganay eo amin’ilay zazakely.

²¹ Rainay any An-danitra, ao amin’ny Baiboly dia nentin’izy ireo teo Aminao ireo ankizy kely, mba Ahafahanao mametraka ny Tanganao eo amin’izy ireo ka mitso-drano azy. Ary marina tokoa, Tompo, voatso-drano izy ireo. Ary ankehitriny mba hanarahana ny Ohatraz, ilay zavatra izay Nataonao, dia miezaka akaiky mihitsy izahay, Tompo, ny mamaky ny Baiboly sy manaraka ny ohatra izay Nataonao fotsiny. Ary ity ray sy reny ity, Rahalahy sy Ranabavy Hickerson, ireo mpianatra malalanay eto amin’ny Tabernakla, dia mitondra aminay an’ity hafaliana bitika kely izay Napetrakao ho karakarain’izy ireo ity. Avy Aminao izy, Tompo. Ianao no nanome azy ireo an’ity zaza ity. Ary ankehitriny izy ireo dia maniry ny hanome ny fiafianana keliny ho Anao, mba ho an’ny asa iray ho Anao. Mivavaka aho mba Hitahianao an’ity zaza ity, mba Hanomezanao azy fiafianana lava iray. Enga anie izy ho velona, raha azo atao, mba hahita ny Fihavian’ny Tompo. Mivavaka aho mba Hitahianao azy na aiza na aiza misy azy. Enga anie izy ho voataiza ao amin’ny tokantrano Kristiana, satria teraka tao amin’ny anankiray izy. Ary enga anie izany hitohy ao amin’ity tokantrano ity. Enga anie ilay ray sy reny ho velona mba hahita an’ilay zazakely eto amin’ny polipitra, raha azo atao, mitory ny Filazantsara. Aleon’izy ireo mahita azy tahaka an’izany, Ray, toy izay ho eo amin’ny—ny seza fiandrianana any amin’ny White House, na any an-kafa any ho any, satria Mpanomponao izy ireo, ary maniry ny fiafian’ilay zazakely mba ho voatokana sy ho fitahiana iray ho an’ny asan’Andriamanitra.

²² Mivavaka aho ankehitriny, Ray, mba Hitahianao an’ilay ankizy. Ary enga anie ny fahasooavan’Andriamanitra ho eo aminy, ary enga anie izy ho salama sy sambatra amin’ny fiafianany rehetra. Ary enga anie ilay ray sy reny ho velona mba hahita azy hitombo, mangataka indray izahay. Tahio izy izay tsofinay rano amin’Ny Anaranao.

²³ Ary ankehitriny, ry Stephen Hollin Hickerson kely, atolotro an’i Jesosy Kristy ianao, mba ho eo aminao anie ireo tsodrano izay nangatahanay ireo. Aoka ho salama sy hatanjaka, ry rahalahy keliko, ary enga anie ianao ho velona mba

hanome voninahitra an'Andriamanitra. Amin'ny Anaran'ny Jesosy Kristy no angatahanay an'izany. Amena.

Andriamanitra hitahy anao. Andriamanitra hitahy anareo. Zazakely tena mamy.

Any amin'izay tsy haha-antitra antsika intsony,
tsy ho antitra intsony,
Ao amin'ilay Tany izay tsy haha-antitra antsika
intsony;
Tsy ho antitra intsony, tsy ho antitra intsony,
Ao amin'ilay Tany izay tsy haha-antitra antsika
intsony.

²⁴ Tsy mahafinaritra ve izany? Ny tanora ho olon-dehibe, ary ny antitra ho tanora. Ankehitriny, tsy mahafinaritra ve izany? Ary tsy harary intsony isika, na hanana alahelo intsony, na ho faty intsony.

²⁵ Ankehitriny, ireo fivoriana, efa nilaza Rahalahy Neville. Izaho ankehitriny dia te-hilaza, ihany koa, fa izany fivoriana izany, aza adino ilay izy, ary ireo fivoriana izay noresahany. Izao koa, Rtoa. Ford izay tonga tato amin'ny fiangonana taloha taona maro lasa izay, dia nentiko tany amin'ny zananivavy izy, andro vitsy lasa izay, ary valopolo taona izy, dia lasa nihaona amin'ny Tompo omaly hariva tamin'ny valo ora, heveriko. Ary ireo fotoana ho azy, izaho sy ny pasitera no hanao an'izany ao amin'ny trano fivavahana kely any amin-dry Coots ny Alarobia, amin'ny folo—folo sy sasany, amin'io Alarobia ho avy io. Rtoa. Ford, Rtoa.... Mieritreritra aho fa adinoko hoe inona ny... Levi, Rtoa. Levi Ford. Ny... Izany dia—izany dia ny renin'i Lloyd Ford izay hitanareo eo amin'ny bokiko, izay saika hitahiry an'ilay palitao sy pataloan'ny Boy Scout ho ahy izy, ary tsy nahazo afa-tsy tongo-pataloha anankiray tavela fotsiny aho. Ankehitriny, izany dia—ny renin'ilay zazalahy izany. Noho izany dia nitondra azy aho indray andro ary nivavaka niaraka taminy, ilay zavatra antitra mampalahelo. Ary lasa nihaona amin'ny Tompo Jesosy izy.

²⁶ Ankehitriny, raha sitraky ny Tompo, dia nanana zavatra aho teto mba ahafahako milaza fa ireo fivoriana, raha ho avy amin'ity herinandro manaraka ity izy ireo, raha nametraka azy ireo teto aho, na farafahakeliny dia nieritreritra fa nataoko, mikasika an'izay saika horesahako amin'ny—ny—ny ho avy, io fivoriana ho avy amin'ny herinandro manaraka io. Raha izaho—mieritreritra aho... Nieritreritra aho fa nametraka azy tato amin'ity boky ity, tsy fantatro na nanao aho na tsia. Eny, ity ilay izy. Raha sitraky ny Tompo, amin'ny Sabotsy hariva dia tiako ny hitory eo amin'ny lohahevitra hoe "Nahoana ny olona anankiray no mitaona ny fiainan'ny hafa." Ary amin'ny Alahady maraina dia tiako ny hitory eo amin'ny "Ilay saron'ny pyramida." Ary amin'ny Alahady hariva dia tiako ny hitory eo amin'Ny Mpitari-

dàlako, ny lohahevitra, *Ny Mpitari-dàlako*, ho amin'io Alahady hariva ho avy io. Ankehitriny enga anie ny Tompo hitahy an'ireo zavatra ireo ka hanampy ahy, raha teto aho, dia tsoa-kevitra kely fotsiny mba handraisana azy ireo.

²⁷ Ankehitriny izao hariva izao, dia te-handeha haingana isika ary hanana zavatra vitsivitsy. Eo amin'izay ihany, dia manana taratasy iray aho eto izay—izay tonga tao amin'ny taratasy nalefa, rehefa naka an'izany i Billy vao teo, hoe any Michigan ireo rahalahy sasantsasany, ary ity dia avy amin'ny fikambanan'ny mpitoriteny izay manana zavatra betsaka. Izany no mampifanjevo an'ireo zavatra, hitanareo. Fa, nilaza izy ireo ato hoe ireo rahalahy sasantsasany any dia nilaza fa izaho no naniraka azy ireo tany, ary mitory izy ireo fa ireo lehilahy dia tokony hiala amin'ny vadiny ka hitady namana ara-panahy, sy hoe—hoe tsy mety diso tanteraka tokoa aho. Fa tsy misy na inona na inona... Ary, oh, ny sasany amin'ireo zavatra mahatsiravina indrindra izay hany henonareo. Ary ny fikambanan'ny mpitoriteny no nandray an'izany, ka nanoratra taratasy ho ahy izy ireo mikasika an'izany, sy hoe izaho no nandefa azy ireo tany ka niteraka fifanjevoana maro izany. Ary ny sasany amin'izy ireo dia maminany sy milaza fa ny lehilahy iray dia tokony hiala amin'ity vady ity ka hanambady an'itsy anankiray itsy. Ankehitriny, ity fiangonana ity dia mahafantatra fa tsy manohana karazana rediredy tahaka an'izany isika.

²⁸ Mino ny Baiboly isika. Mino isika fa rehefa maka vehivavy iray ny lehilahy, dia izany no vadiny, ary ny fahafatesana irery ihany no afaka mampisaraka azy ireo. Izany irery ihany. Tsy mino ny karazan-javatra tahaka an'izany isika. Isika dia tsy mino ny fitiavana malalaka, ihany koa. Tsy mino ny karazan-javatra tahaka an'izany isika. Isika dia mino tanteraka ny Baiboly tokoa, ary Izany irery ihany. Noho izany dia hataoko dika mitovy fotsiny ilay izy, dika an'ity taratasy ity, ary hanome ny valin-teniko ho an'izany ka hametraka azy ao anatin'ireo magazina, ary izany no—izany no handamina an'ilay izy. Manantena aho fa izany no, na ahoana na ahoana, hamaly azy ireo.

²⁹ Ankehitriny izao hariva izao, alohan'ny hanokafantsika ny Soratra mihitsy, dia ndao isika hiresaka amin'ny Tompontsika.

³⁰ Rainay any An-danitra, manatona Ny Seza fiandrianan'ny famindramponao izahay, amin'ny Anaran'ny Tompo Jesosy, Ilay Anankiray lehibe Izay nidina avy tany amin'ny Voninahitra mba hanambara aminay an'ireo harenan'ny zavatsarobidin'Andriamanitra. Toy ny ahoana no isaoranay Anao ny amin'io Jesosy lehibe Izay ny fanehoana an'Andriamanitra io, natao ho anay manokana, ary amin'ny Alàlany no anananay fanavotana amin'ny fahotanay. Ary ankehitriny dia tafafindra avy tamin'ny fahafatesana ho amin'ny Fiaianana izahay, satria mino Azy. Satria izao no voasoratra ny Aminy, fa Izy dia nilaza

hoe, “Izay mandre an’Ireo Teniko ka mino Izay naniraka Ahy, no manana Fiainana mandrakizay, ary tsy ho tonga amin’ny fitsarana, fa efa tafafindra avy tamin’ny fahafatesana ho amin’ny Fiainana.”

³¹ Tahio Ireo Teninao, izao hariva izao, Tompo. Ary eto izahay mba hanao ny fandraisana ao anatin’ny fotoana fohy fotsiny. Ny Kristiana, ireo olona teratanin’ny Fanjakana dia hiangona manodidina ny alitara, ary eo izy ireo no handray an’izay antsoinay hoe “ny fandraisana,” ilay—ilay ampahany kely an’ny—an’ny sakramenta izay Navelanao ho anay, mba haneho fa mino izahay hoe maty nohon’ny fahotanay Ianao, ary nitsangana indray tamin’ny andro fahatelo, ka velona mandrakizay, ary manao an’izao izahay mandra-Piverinao, araka ny Soratra izay nandidiana anay. Hamasino ny fonay hiala amin’ireo fisainan-dratsy sy ny rehetra nataonay izay nifanohitra tamin’ny Sitraponao lehibe. Ray, mamelà anay, ary omeo anay ny Fahasoavanao izao hariva izao. Vakio ho anay ankehitriny ilay Mofon’Aina, ao amin’ny Teny, raha mamaky an’Izany sy miresaka eo amin’Izany izahay. Amin’ny Anaran’ny Tompo Jesosy, no angatahanay an’izany. Amena.

³² Ankehitriny ao amin’ny Bokin’ny Apokalypsy, manomboka amin’ny andininy anankiray fotsiny ihany, maniry aho ny hamaky ny andininy faha-20, na ny andininy faha-1 an’ny toko faha-20.

Ary nahita anjely iray nidina avy tany An-danitra aho, nanana ny fanalahidin’ny lavaka tsy hita noanoa sy gadra lehibe teny an-tanany.

³³ Ankehitriny dia te-hiresaka aho, raha mety ilay izy, raha tsy maintsy hiantso azy ho lahateny avy amin’ity aho, na hisintonia tsoa-kevitra iray avy amin’ity lahateny ity, mandritry ny roapolo na dimy amby roapolo minitra manaraka, dia ho tiako ny hiantso azy hoe, *Ilay Fanalahidy Ho An’Ilay Varavarana*. Ankehitriny, tsy maniry aho ny—ny hanao azy hoe “ireo fanalahidy,” satria i Petera no nomena “an’ireo fanalahidin’ny Fanjakana.” Fa tiako ny hiantso azy hoe: *Ilay Fanalahidy Ho An’Ilay Varavarana*. Ary avy eo aorian’ity avy hatrany, dia maniry aho ny hanome fanazavana kely ny amin’ny fandraisana, alohan’ny andraisantsika an’izany izao hariva izao.

³⁴ Ankehitriny, fanalahidy iray. Mahamarika aho eto raha namaky isika, fa ity Anjely ity dia nidina avy tany An-danitra, nanana ny fanalahidy teny an-tanany. Mino aho fa Apokalypsy 13 na 19 izany, dia mahita indray isika, Anjely hafa tonga miaraka amin’ny fanalahidy iray. Ary ny fanalahidy iray, ny tanjon’ny fanalahidy, dia ny hanokatra zavatra, zavatra izay nohidiana, na zavatra izay tokony ho hidiana. Fa nomena ho an’izany tanjona izany ny fanalahidy iray.

³⁵ Ankehitriny, misy maro ireo karazana fanalahidy, satria manana fampiasana fanalahidy maro isika. Misy ireo fanalahidy ho an'ny trano fitehirizana. Misy ny fanalahidy ho an'ny tranonareo manokana, misy ny fanalahidy ho an'ny fiaranareo manokana. Ary isika dia miantso azy ireo hoe fanalahidy, ary fanalahidy izy ireo. Ary izy ireo dia azo anaovana dika, imbetsaka. Na ho an'ny trano, indraindray dia azo amboarina, izay antsointsika hoe, ny fanalahidy mahavoha ny rehetra. Amin'ny teny hafa, izany dia fanalahidy iray izay vita tamin'ny karazana faningaina, mihetsika eo aminy, izany—manodina an'ilay fanidiana amin'ny fomba anankiray izany ary saiky afaka manokatra ny varavarana rehetra, antsoina hoe “fanalahidy mahavoha ny rehetra.” Izany dia rafitra fanalahidy iray mahavoa ny rehetra avy amin'ny fanalahidy maro, ary afaka manokatra amin’izany fomba izany, an’ireo tranontsika sy ny fierantsika mihitsy aza, azo anaovana dika. Ary noho izany dia misy . . .

³⁶ Ny fanalahidy rehetra dia tsy afaka manokatra varavarana raha tsy ampiasain’ny tånana iray. Tsy maintsy misy zavatra mampiasa an'ilay fanalahidy. Ilay fanalahidy izy tenany dia tsy afaka mampiasa ny tenany. Tsy maintsy misy zavatra mihazona an'ilay fanalahidy.

³⁷ Izany dia tahaka an'ity fanamafisam-peo ity izay izaho—izay itenenako. Moana ity fanamafisam-peo ity. Raha tsy misy zavatra miteny amin'ny alàlan, dia tsy afaka miteny amin'ny alàlan’ny tenany izy. Tsy maintsy misy zavatra miteny amin'ny alàlan. Noho izany, tsy ilay fanamafisam-peo izany, izany dia ilay feo na ilay—ilay tabataba (ao ambadika) izay ampitain’ny fanamafisam-peo amin’ny—ny onjam-peo, mankeo amin'ny sofinareo.

³⁸ Ankehitriny, tahaka an'izany ny fitoriana ny Filazantsara. Tsy ny tenanay ilay izy, amin'ny maha-mpitoriteny, tsy izahay no Filazantsara. Fa izahay dia mpampita fotsiny ihany izay mampita ny Feon'Andriamanitra amin'ny alàlan’ny asanay, an'ny olona, mankany amin'ilay mpihaino.

³⁹ Toy izany ny fahitana iray. Tsy mahafantatra na inona na inona ho lazaina amin'ny fiangonana aho amin'io fotoana io mikasika ny fahitana iray. Fa raha ny Fanahy Masina no haneho, aloha, amiko fahitana iray, amin'izay fotoana izay aho vao mampita an'ilay fahitana mankany amin'ny anankiray izay iantefany. Noho izany tsy ny, izaho, tsy izaho ilay fahitana, izaho. Izany dia Andriamanitra no nanome an'ilay fahitana, ary nihetsika amin'ny maha-mpampita aho, mba hitondra an'ilay hafatry ny fahitana ho amin'ny olona.

⁴⁰ Ankehitriny, ilay zavatra iray ihany amin'ny fanalahidy. Mamelà ahy. Ny fanalahidy dia tsy maintsy hazonin’ny tånana anankiray mba hanokatra ny varavarana. Hitanareo, tsy maintsy misy tånana izany. Ankehitriny, ary mikasika an'ilay fanalahidy

izay horesahako izao hariva izao, dia t nana anankiray irery ihany no afaka mihazona an'ity fanalahidy ity, ary izany dia ny t nan'ny finoana. Izany no zavatra tokana afaka—afaka mihazona an'ity fanalahidy ity. Mihazona fanalahidy hafa ireo t nana, fa ilay izy dia mila t nan'ny finoana iray ho an'izany.

⁴¹ Ankehitriny, alaintsika ohatra ny fanalahidy ho an'ny fahalalana. Ankehitriny, ny olona iray dia tsy maintsy, raha miezaka ny manangona fahalalana izy, hitanareo, ankehitriny, dia misy fanalahidy ho an'izany. Misy fomba iray tsy maintsy hanokafan'io olona io an'izany. Izy dia tsy maintsy ho...manana an'ireo bokiny sy ny fianarany, ary izy tsy afaka...tsy misy anankiray afaka mianatra azy. Mety mampianatra azy izy ireo, saingy tsy maintsy mianatra izy. Ary ny fomba tokana hahavitana an'izany, dia tsy maintsy mit na an'io fanalahidy io izy, ilay zavatra ao anatin'y izay manokatra na ma... manambara aminy an'ilay fahalalana izay tadiaviny.

⁴² Ary misy ireo olona tahaka an'izany izay hanandrana hitendry piano, ary izy ireo...na mozika. Tsy fantatr'izy ireo fotsiny hoe ahoana no anaovany azy, fa handeha eo izy ireo ary mety hanome lesona sy lesona ilay mpampianatra, fa tsy hianatra an'izany mihitsy izy ireo. Tsy afaka hihazona an'ilay fanalahidy ho an'io zava-miafina io mihitsy izy ireo, hoe ahoana no fanenor'ilay b n-kira sy ny feon'ny feon-kira sy ny sisa. Mila an'ilay fanalahidy izany.

⁴³ Ary ny matematika, misy fanalahidy iray ho an'ny matematika, izay tsy maintsy hahitanareo an'ilay fandrika eo amin'izany. Efa nahita lehilahy izay afaka naka andalana tarehimarika efatra aho, ary nametraka ny rantsan-t nan'izy ireo, ny rantsan-t nan'ny tsirairay teo amin'ny andalana tarehimarika iray, ary nidina avy hatrany tahaka an'izao fotsiny angamba nidina andalana dimy na enina, dia nametraka ny valiny teo amin'ny farany ambany. Nikaonty andalana efatra amin'ny fotoana iray, hatraiza hatraiza nanomboka tamin'ny iray hatramin'ny sivy. Eny, izaho dia mandalo fotoana sarotra eo am-pikaontina andalana anankiray, raha tsy manana rantsan-t nan'ny sy rantsan-tongotra ampy hanisana, mba—mba hahavitana andalana tarehimarika anankiray. Tsy afaka mahita an'izany fanalahidy izany mihitsy aho. Fa, hitanareo, ny sasany amin'izy ireo dia manana an'ilay fanalahidy ho an'izany fotsiny, fantatr'izy ireo hoe ahoana no hanaovana azy.

⁴⁴ Ary misy fanalahidy iray ho an'ny fahalalana, olona iray mitady fahalalana. Misy fanalahidy iray ho an'ny siansa, ireo fikarohana siantifika. Ankehitriny, misy ny, izany dia fanalahidy lehibe. Mitady an'izany fanalahidy izany ny olona.

⁴⁵ Tahaka ny teto fotoana vitsy lasa izay dia nahita atoma iray izy ireo, ary nahafantatra fa nisy ireo atoma, ary avy eo ireo atoma dia namorona an'ireo molekiola sy ny sisa. Ankehitriny,

manao ny fikarohana izy ireo, olona iray no nino fa io atoma io no nihazona ny zavatra rehetra niaraka, raha afaka avotsotra ilay atoma, dia hanala an'izay hazoniny izy ary hanaparitaka azy. Satria, ny zavatra rehetra dia voatazon'ny atoma, fantatsika izany. Ankehitriny, ity andry ity dia voatazon'ny atoma. Voatazon'ny atoma ianareo. Ny ahitra, ireo hazo, ny zavatra rehetra dia voatazon'ny atoma miaraka. Eny, raha izany atoma izany, no mitondra ny rehetra ao amin'ny lâlana anankiray, raha afaka vakiana sy ahodina indray izy, amin'izay fotoana izay dia handrava izy. Ary, ankehitriny, ireo siantifika malaza dia mino fa afaka atao izany, ka niasa sy niasa izy ireo, ary nipetraka isan'ora, sy isan-kerinandro, isan-taona, hany ka farany dia vitan'izy ireo ilay izy.

⁴⁶ Izany dia, mino aho, i Thomas Edison, teo amin'ny jiro, dia nilaza izy ireo fa nanana fahalalana iray ilay lehilahy izay nahafahany namokatra jiro elektrika. Izy no mpamorona ny jiro takamo. Ary tsy natory mihitsy aza izy amin'ny alina. Naka mofo misy hena iray izy teny an-tânany ary nihinana ny sakafony, ka nipetraka teo ary nieritreritra sy niasa. Tany ho any tao ambadiky ny fisainany, dia nisy zavatra niteny taminy fa afaka mahavita an'izany izy. Inona izany? Izany dia fanalahidy iray izay afaka manokatra an'ilay lâlana.

⁴⁷ Tsy taona maro lasa izay, dia nisy le-lehilahy iray izay nino fa nanana talenta hanoratra boky momba ny tantara an-tsary izy. Nino izy fa nihazona an'ilay fanalahidy teny an-tânany. Ary izy dia nila... nandeha izy... Nipetraka tany Kansas izy. Nandeha tany amin'ny mpamokatra ny gazety malaza tany Kansas City izy, ary nitondra ny sasany tamin'ireo sorany. Dia hoy ilay mpamokatra hoe, "Tompoko, tsy manana an'ilay izy fotsiny ianao. Ianao, tsy misy ilâna ny ezaka, ianao, tsy afaka manao an'ilay izy ianao." Saingy tsy nahafa-po azy izany. Fantany fa nananany ilay izy. Ary namerimberina indray izy, niezaka, fa izy (ilay mpamokatra) dia nandà azy. Farany, dia nandeha tany amin'ny toerana hafa izy, nefà nandà azy izy ireo, nanao hoe, "Andriamatoa, tsy manana an'ilay izy fotsiny ianao. Tsy afaka manao an'izany ianao." Kanefa izy dia nino fa afaka manao an'ilay izy. Ary tahaka an'izany ilay izy, nanana zavatra izy teny an-tânany! Farany, azony ilay asa fanoratana kisoratsoratra kely sasantsasany ho an'ny, mino aho, ilay lahatsoratra na zavatra ho an'ny fiangonana, karazana boky momba ny tantara an-tsary kely anankiray ho an'ny fiangonana. Ary nanofa garazy kely feno voalavo na totozy ho azy izy, izay nihazakazahan'ireo totozy manerana an'ilay toerana rehetra sy ny sisa, tao amin'ireo taratasiny, ary nanomboka nahamarika fiavahana tamin'ny totozy kely anankiray izy. Teo no teraka ny tantaran'ny Mickey Mouse. Ankehitriny dia Walt Disney mpanapitriza iray izy. Nahoana? Nanana zavatra teny an-tânany izy, ary fantany fa nihazona an'izany izy, fantany fa afaka

nahavita an'izany izy. Ary tahaka an'izany no nahavitana an'ireo zava-bitia malaza rehetra. Rehefa manana zavatra eny an-tànany ireo lehilahy sy vehivavy, ka fantatr'izy ireo fa afaka manao an'izany izy ireo.

⁴⁸ Rehefa namely ny firenena ny lefak'ozatra. Dia, nodidiana isika ankehitriny mba handeha hanao an'io vaksiny io, mba hamongorana an'izany. Rehefa namely ny lefak'ozatra . . . Omaly dia nihaino dokotera iray aho raha namily fiara teny an-dàlana, dokotera anankiray avy any Louisville. Hoy izy hoe, "Taona vitsy lasa izay, rehefa namely an'i Louisville ny loza lehibe," hoy izy, "raha nijoro teo amin'izay nijoroako ireo lehilahy, ka nahita fitrohan-drivotra fito amby dimampolo tamin'ny fotoana iray, ary ireo lehilahy, ireo vehivavy, ireo tovolahy sy tovovavy, naлемy niaraka tamin'ny aretina iray nantsoina hoe 'lefak'ozatra,' nefä tsy nisy zavatra azo natao nikasika an'izany." Hoy izy hoe, "Tsy te-hahita zavatra tahaka an'izany mihitsy indray aho."

⁴⁹ Fa nieritreritra ny siansa hoe, "Raha misy karazana ratsy toy ny lefak'ozatra, dia azo antoka tokoa fa misy zavatra mba hanoherana an'izany." Niady izy ireo, nitsangana teny an-dàlana niaraka tamin'ireo kiraro, ireo mpamono afo, nanala an'ireo satroka izy ireo, ary niangavy, nivezivezy izy ireo, nanao ny zavatra rehetra, niezaka hahita an'ilay fanalahidy hanokafana ny varavarana ho an'ny fanafahana. Ary, farany, Kristiana mihaja anankiray amin'ny anarana hoe Salk no nahita an'ilay vaksiny. Nahoana? Nisy ratsy nikendry, nisy mpamono iray nikendry; nisy fanalahidy iray tany ho any izay afaka nanokatra fahafahana indray ho an'ny olona, ary ny vaksiny Salk no fitsaboana lehibe. Oh, ny azon'ny fanalahidy atao! Novokarina ilay vaksiny, ary ankehitriny dia fongotra ny polio tamin'io vaksiny io, satria izy dia "tsy reraka mihitsy ary tsy nilavo lefona mihitsy," fa nipetraka tany ho any ilay fanalahidy. Nisy zavatra izay hatsindrona hanohitra an'izany, ary tapa-kevitra izy ireo ny hitady an'ilay izy.

⁵⁰ Ary raha misy karazana ratsy toy ny lefak'ozatra, fivalanana, nendram-boalavo, tazo vony, tetanosy, ramanenjana, sy ny sisa, ka ny siansa, ireo ratsy ireo, dia afaka niady, andro aman'alina, mandra-pahitan'izy ireo tsindrona iray manohitra an'ilay izy, satria ratsy izany, mpamono izany, tsy mihoaatra noho izany ve no hisian'ny fanalahidy iray ho an'ny famonjena olona anankiray izay ao an-tranon'ny tranomaizin'ny fahotana? Misy fanalahidy iray ho an'izany varavarana izany, mba hanafaka ny olona amin'izany.

⁵¹ Ny fanalahidy iray, mazàna, rehefa mihodina manidy izy, ary, rehefa mahita fanalahidy iray ianareo, dia tokony hisy zavatsarobidy anankiray, zavatra izay lafo vidy, raha tsy izany dia tsy ho nanidy azy akory aza ianareo. Raha tsy ilaina ny manidy azy, dia avelao fotsiny ilay izy. Fa rehefa ilaina ny manidy azy!

Noho izany ny fanalahidry iray mazàna no—no vahaolana ho an'ny zavatra anankiray, na ny lèlana hidirana amin'ny zavatra anankiray izay lafo vidy. Ny fanalahidry, ho an'izany no ilàna azy, ankehitriny, hanokatra zavatra anankiray izay lafo vidy izy.

⁵² Ankehitriny mamaky isika ao amin'ny Masindahy Jaona, ny toko faha-10, hoy Jesosy hoe, “Izaho no ilay Varavarana ho an'ny valan’ondry. Izaho no ilay Varavarana,” tsy *ny* varavarana, “*ilay* Varavarana, *ilay* Varavarana tokana. Izaho no ilay Lèlana, *ilay* Lèlana tokana, *ilay* Fahamarinana, ary *ilay* Fiainana, ka tsy misy olona manatona ny Ray raha tsy amin'ny Alàlako. Izaho no *ilay* Varavarana ho an'ny valan’ondry ary izay rehetra tonga Alohalo dia fahavaloo, mpangalatra ary mpandroba.” Izy no *ilay* Varavarana ho an'ny valan’ondry. Izy no *ilay* Varavarana ho an'ny famonjena.

⁵³ “Tsy misy anarana hafa eto ambanin’ny Lanitra nomena izay tokony hahavonjy anareo, afa-tsy amin'ny alàlan’ny Anaran’i Jesosy Kristy.” Tsy misy fiangonana, tsy misy anaram-pianganana, tsy misy fanekem-pinoana, tsy misy foto-pampianaranana an'ny inona na inona; afa-tsy amin'ny alàlan’ny Anaran’i Jesosy. Izany *ilay*—izany *ilay* Fanalahidry. Tsy mahagaga i Petera raha afaka nampiasa ny anankiray tamin’ireo tamin’ny Andron’ny Pentekosta! Te-hahafantatra izy ireo hoe ahoana no hidirana amin’io Varavarana io. Nampiasa an’*ilay* Fanalahidry izy. Ary Fanalahidry anankiray ihany no misy, satria Varavarana anankiray fotsiny no misy. “Izaho no *ilay* Varavarana.” Ary Petera no nanana an’*ilay* Fanalahidry ho an’Izany. Ka hoy izy hoe, “Mibebaha, ny tsirairay avy aminareo, ary aoka hataeo batisa amin'ny Anaran’i Jesosy Kristy ho an'ny famelàna ny fahotanareo, ary ianareo handray ny zava-tsarobidin’Andriamanitra.” Izany no *ilay* Fanalahidin’*ilay* Varavarana, ary Jesosy no *ilay* Varavarana.

Varavarana anankiray ihany no misy ho an'ny fanasitranana, ary Jesosy izany Varavarana izany.

⁵⁴ Varavarana anankiray ihany no misy ho an'ny fiadanana. Hia. “Ny Fiadanako no Omeko anareo.” Izy ihany no Varavarana anankiray ho an'ny fiadanana tena izy. Mety mieritreritra ianareo fa manana fiadanana. Mety manangom-bola ampy hidivianana ny tranonareo ianareo, mety manangom-bola ampy hidivianana ny akanjon’ny zanakareo ianareo, hanana sakafô ho hanina, fa mety nahangona laza ampy ianareo mba halaza eo anivon’ny olona. Saingy rehefa manala ny kiraronareo ianareo amin'ny alina ary vonona ny hatory, dia Zavatra Anankiray ihany no afaka manome anareo fiadanana. Izany dia, raha fantatrareo fa eo am-pahafatesana ianareo amin’io alina io, dia Fiadanana anankiray ihany no misy, ary, izany dia, Jesosy no *ilay* Fiadanana. Izy no Fiadanantsika.

⁵⁵ Izy no Fanasitranana antsika. “Izaho no Tompo Andriamanitrao izay manasitrana ny aretinao rehetra.”

⁵⁶ Izy no ilay Varavarana ho an’ny Lanitra. Ary tsy misy varavarana hafa na lèlana hafa afa-tsy amin’ny alàlan’i Jesosy Kristy. Izy no ilay Varavarana ho an’ny Lanitra.

⁵⁷ Ary ankehitriny dia Jesosy no ilay Varavarana ho an’ireo zavatra rehetra ireo, ka ny finoana no Fanalahidy izay manokatra an’ilay Varavarana. Ankehitriny, raha Jesosy no ilay Varavarana ho an’ireo teny fikasan’Andriamanitra rehetra ireo, dia ny finoana ao amin’ireo Asany vita no manokatra ny varavarana tsirairay ho an’ny zava-tsarobidy tsirairay izay ao anatin’ny Fanjakan’Andriamanitra. Hitanareo ve ilay izy? Ny fanalahidy dia... Ny finoana no fanalahidy izay manokatra ny teny fikasana tsirairay izay Ataony. Ny fanalahidin’ny finoana no manao an’izany, ny finoana ao amin’ireo Asany vita. Izany ireo fanalahidy izay resahantsika.

⁵⁸ Ankehitriny ao amin’ny Hebreo, ny toko faha-11, manana lisitra lava be amin’izy ireo aho voasoratra eto, an’ireo mahery fon’ny finoana. Ilay fanalahidy, ho—ho an’ilay Varavarana, no nampijanona ny vavan’ny liona. Ilay fanalahidy, ny finoana, no nanokatra an’ireo tranon’ny tranomaizina. Ny finoana, ny fanalahidin’ny finoana, no namono ny herin’ny afo, afaka tamin’ny lelan-tsabatra, namerina ny maty indray ho amin’ny fiainana. Izany dia ny finoana, ilay fanalahidin’ny finoana an’ilay Andriamanitra velona. Izany tånama izany, izany lehilahy izany, izany vehivavy izany, izay afaka maka an’io fanalahidin’ny finoana io, izy ireo no afaka manokatra ny teny fikasana tsirairay izay nataon’Andriamanitra. Fa raha tsy manana an’io fanalahidy io ianareo, dia mangataka fotsiny, tsyahasokatra an’izany mihitsy ianareo. Hidona amin’izany ianareo, satria io fanalahidy io...

⁵⁹ Ny fanalahidy vita tsara dia manana fanningaina ao anatin’ilay fanidiana, ary mila endrika anankiray izany, bika anankiray amin’ireo fanalahidy mba hanodina an’ireo fanningaina ireo. Ary fanningaina kely anankiray tsy azo ampiasaina fotsiny, dia hanimba an’ilay zavatra manontolo.

⁶⁰ Noho izany, mino ny Filazantsara feno aho, ny Tenin’Andriamanitra tsirairay, izay mamoka ny herin’Andriamanitra, izay mitondra an’ireo Fitahiany ho an’ny olona. Izany no ilay fanalahidin’ilay Varavarana, izay manokatra Azy. Oh, ireo mahery fo malaza ireo, ireo mpaminany sy lehilahy malazan’ny Baiboly ireo, izay nanana an’io fanalahidy io! Izany no antony nahafahan’izy ireo nampijanona ny vavan’ny liona, namono ny herin’ny afo, afaka tamin’ny lelan-tsabatra, namerina ny maty ho amin’ny fiainana indray, ary nanao an’ireo karazana fahagagana rehetra, dia satria nihazona an’io

fanalahidy io izy ireo ary nahafantatra fa niasa izany, satria fanalahidy nateraky ny Soratra ilay izy.

⁶¹ Ankehitriny, raha mangataka fotsiny miaraka amin'ny fanalahidin'ny fanelekem-pinoana iray aho, dia tsy fantattro izay hataoko. Raha milaza izy ireo hoe "ny fiangonako dia mampianatra an'ity," dia tsy fantattro ny momba an'izany.

⁶² Fa rehefa ny Baiboly no mampianatra an'ilay izy, dia mihazona an'ilay fanalahidin'ny finoana eo an-tànako aho, na ao am-poko, izay manao hoe "Tenin'Andriamanitra izany," hamono ny herin'ny afo izany, hanokatra ny fanasitranana ho an'ny marary izany, hanokatra ny famonjena ho an'ny very izany. Tokony hanatona an'ilay Varavarana aho, ny zavatra rehetra dia amin'Ny Anarany. "Na inona na inona ataonareo amin'ny teny na asa, dia ataovy amin'Ny Anarany izany rehetra izany." Mahafantatra fa ilay fanalahidy izay anananareo dia ny finoana, satria fanalahidy iray nataon'ny Soratra izany. Ankehitriny, raha fanalahidin'ny fanelekem-pinoana izany, fanalahidy aranaram-piangonana, dia tsy fantattro izay hataon'izany. Fa raha fanalahidy ara-tSoratra ilay izy, dia hanokatra izany, satria Andriamanitra no niteny an'izany. Ankehitriny, oh, tsy mahagaga izy ireo raha afaka nampijanona ny herin'ny afo, sy ny sisà, nanana an'ilay fanalahidy izy ireo.

⁶³ Ny fiatokatoan'Andriamanitra voalohany tamin'ny anankiray tamin'ireo mpaminany ireo, dia tsy nisy na inona na inona afaka nampijanona azy ireo. Tsy nila nanao tahaka ny Ataony amiko indraindray Izy, mameley mafy an'izany hatrany sy hatrany, ary angamba ianareo (manantena aho fa tsy ianareo), fa manohy miteny amiko hoe, "Mandehana ataovy izao," ary avy eo ianareo dia ho tafintohina, "Avy eo dia mandehana ataovy ity," ary "Mandehana miverina ary ataovy indray izany, tsy manao an'ilay izy tsara ianao." Fiatokatoana anankiray kely fotsiny! Izao fotsiny, izy ireo dia afaka nahatsapa ny Fanahy niteny tamin'izy ireo fotsiny hoe, "Izao no zavatra atao," ary tsy nisy na inona na inona nampijanona azy ireo. Rahalahy, izy ireo—izy ireo—nampijanona ny vavan'ny liona izy ireo, afaka tamin'ny lelan-tsabatra izy ireo, namono afo izy ireo, nanao ny zavatra rehetra izy ireo. Fiatokatoana kely anankiray avy amin'Andriamanitra fotsiny, satria nihazona an'ilay fanalahidy teny an-tànany izy ireo, io finoana lehibe io! Nanao an'ireo zavatra ho an'Andriamanitra izy ireo satria tsy hisy na inona na inona hampijanona azy ireo. Oh, be voninahitra toy ny ahoana!

⁶⁴ Tahaka an'ilay lehilahy tanora indray mandeha tonga teo amin'ny rahalahy antitra iray izay lehilahy antitra masina, mpaminanin'Andriamanitra antitra iray. Ary henony fa ity lehilahy ity dia nijoro vavolombelona tsy ankitsahatra, niteny tsy ankitsahatra mikasika ny fahatsaran'Andriamanitra, sy hoe ahoana no naha-izy an'Andriamanitra, ary izay naha-izy an'i Kristy, ka nandroso fotsiny, niresaka. Farany, ity lehilahy

tanora ity dia ho voatendry ao amin'ny asam-panompoana, noho izany dia nanatona an'io hendry antitra anankiray io izy, ary hoy izy taminy hoe, "Tompoko, te-hametraka fanontaniana aminao aho."

Hoy izy, "Anontanio, ry lehilahy tanora."

⁶⁵ Hoy izy hoe, "Tena midika betsaka ara-bakiteny aminao ve i Kristy araka ny lazaina fa izany Izy?"

⁶⁶ Hoy izy hoe, "Midika amiko mihoatra lavitra noho izay ahafahako manana fofon'aina hiresahana mihitsy aza Izy!" Eo ianareo izao. Inona izany? Nahita an'ilay fanalahidy izy.

⁶⁷ Hoy ilay tovolahy, teo amin'izany hoe, "Raha manambara an'ireo zavatra ireo ianao, ary milaza amiko fa tena misy izy ireo aminao, amin'izay fotoana izay dia te-hahafantatra an'izany Jesosy iray ihany izany aho, ao amin'ny fisiana iray ihany." Inona izany? Fantany fa nihazona fanalahidy iray ilay lehilahy antitra, ka afaka nanokatra sy afaka nanidy izy.

⁶⁸ Fantatrareo, fanalahidy iray izay manidy, no manokatra, ihany koa. Hitanareo? Afaka mamaha sy mamatotra ianareo. Marina izany. Ilay fanalahidy iray ihany izay manidy, no manokatra. Ilay fanalahidy izay manokatra, dia afaka manidy. Ary marina tokoa izany, hitanareo, satria miasa amin'ny lafiny roa izany. Mampahonena toy ny ahoana fa verin'ny fiangonana ny fahitany eo amin'izany! Zavatra mampalahelo toy ny inona rehefa nivarotra ny tenany tamin'ny fanekem-pinoana ny fiangonana, araka ny nataontsika amin'izao andro izao, ary ankehitriny dia miantso mba hiray.

⁶⁹ Hitantsika hoe aiza no hihaona ankehitriny ilay laharam-boninahitra Romana lehibe sy izy ireo, hanova fandaharana sasantsasany izy ireo. Nieritreritra aho fa tsy nanova izy ireo; fa hanova izy ireo, na ahoana na ahoana, manome ny pretra tsirairay ny fahefan'ny papa, ary—ary na aiza na aiza no misy azy, sy ny sisa. Mampahonena toy ny ahoana, fa ny fiangonana dia nanolo-tena ho an'ny dogma raha tokony ho ny Teny. Hitanareo? Teo no namelan'izy ireo an'ilay fanalahidy, teo mihitsy. Izany no antony tsy nahavitana an'ireo fahagagana sy famantaranana lehibe teo anivon'ny olona amin'izao andro izao, izay nisy fahiny, verin'izy ireo ilay fanalahidy! Hia, fantatr'izy ireo ilay Varavarana, fantany fa teo ilay Varavarana, saingy ny zavatra manaraka dia ilay fanalahidy hanokafana an'ilay Varavarana. Ao ambadik'ilay Varavarana ireo zava-tsarobidy. Voahidy izy ireo, tsy hita maso, ho an'ny tsi-mpino. Fa ny mpino, izay manana finoana ka afaka maka an'ilay fanalahidin'ny finoana, dia afaka manokatra an'ireo Varavarana ireo. Eny, tompoko.

⁷⁰ Indray mandeha teto taona vitsy lasa izay, dia nisy rahalahy misionera iray, ary nahatsapa izy fa nanana antso ho any Afrika. Lehilahy tanora izy; niaraka tamin'ny vady iray sy zanaka

anankiroa, tena tsara tarehy, ireo tovovavy, teo amin'ny fito na valo taona teo, ny iray. Ary tsy afaka niala tamin'izany ity lehilahy tanora ity. Izy dia mpi—mpitoriteny iray, nanana fiangonana tsara izy tao amin'ilay faritra. Saingy tsy afaka niala tamin'izany antso izany fotsiny izy hoe, izy "dia tsy maintsy mandeha any Afrika." Ary nivavaka izy, andro aman'alina. Tsy te-handeha izy. Ary nanohy niresaka taminy Andriamanitra hoe, "Tsy maintsy mandeha ianao!" Ary farany izy dia tonga teo amin'ny toerana iray hany izy ka, fampisehoan-kery iray, izay, izy—tsy maintsy mandeha izy!

⁷¹ Noho izany dia nandeha tany amin'ny komity misioneran'ny fiangonany izy, ary hoy izy hoe, "Andriamanitra dia niantso ahy ho any amin'ny sahan'ny misionera any amin'ireo aty ala an'i—an'i Rhodesia." Ary ao amin'io aty ala io dia feno malaria, miaraka amin'ny tazo ary misy an'io masoandro mahamay io, aretin-koditra sy habokana, ary ireo karazana aretina rehetra any amin'io aty ala io, ho any no tsy maintsy hanaovany, handaniany ny sisa amin'ny fiainany. Nivarotra ny tranony sy izay rehetra nananany izy. Noho izany dia te-hitsapa azy ny komit'in'ny misionera, ary hoy izy ireo hoe, "Azonao antoka ve ankehitriny?"

Hoy izy, "Pozitifa aho."

⁷² Hoy izy ireo taminy hoe, "Tompoko, nieritreritra an'izany amin'izao fanao izao ve ianao, hoe manana zazavavy kely anankiroa tsara tarehy ianao, ary ianao dia manana va—vady tanora maha-te-ho tia, ka raha ianao fotsiny... Nahoana ianao no tsy mandeha any dia mijery hoe ahoana ilay izy ary miverina avy eo?"

⁷³ Hoy izy hoe, "Tsia, ny Tompo no niteny tamiko. Oh, tena nisy izany!" Hoy izy, "Ny Tompo no niantso ahy. Ary izaho—tsy te-handao ny tokantranoko aho, tsy te-handao ny fiangonako sy ny havako aho, saingy ny Tompo no niantso ahy tany amin'io aty ala io."

⁷⁴ Ary hoy izy hoe, "Tompoko, fantatrao ve fa mety ho tratry ny tazo vony ireo zazavavinao na tazon'ny fivalanan-drà, ka ho faty, mandritry ny alina?" Ary niresahana an'ireo olona samihafa izay nahavery ny zanany izy, ireo zaza kely, tamin'ny nitondrana azy ireo tany, teo amin'ireo aretina ireo izay tsy nananan'izy ireo tsindrona ho an'izany. Ary hoy izy ireo, "Eritrereto ny amin'ny habokana, ny amin'ny vadinao tsara tarehy sy ireo zazavavinao kely anankiroa tratry ny habokana, ary io masoandro mahamay io sy ireo zavatra tsy maintsy hiaretanao." Hoy izy ireo, "Tsy matalotra ve ianao, ary ireo loza ny amin'ny fitondrana ny zanakao sy ny vadinao any amin'izany karazana toerana izany?"

⁷⁵ Fa nitsangana teo ilay misionera, ilay lehilahy tanora, ary nanomboka niraraka teo amin'ny takolany ireo ranomasso, nitodika izy, hoy izy hoe, "Ry rahalahiko! Ny fahitako

ny antson'Andriamanitra," hoy izy, "raha Andriamanitra no niantso ahy ho any Afrika, ireo zanako sy ny fianakaviako dia voaaro lavitra kokoa any Afrika noho ny any amin'ny toerana rehetra eto amin'izao tontolo izao." Amena. Inona izany? Nanana an'ilay fanalahidy ho an'ny antsony izy, nanana finoana tao amin'izay noresahany izy. Oh, nieritreritra aho hoe, fanamarihana mahery fo toy ny inona! Rehefa nandre an'izany voalohany aho, dia nitroatra ny foko. Hitanareo, "Raha Andriamanitra no niantso ahy ho any Afrika, ireo zanako ao anatin'ny habokana sy aretin-koditra ary ny zavatra hafa rehetra, dia voaaro kokoa any noho ny any amin'ny toerana hafa rehetra eto amin'ny tavan'ny tany." Nanana an'ilay fanalahidy izy. Izay ihany no ilaina.

⁷⁶ Rehefa manana an'ilay fanalahidy ianareo, dia tsy misy tahotra, tsy misy fisalasalana, tsy misy fanontaniana. Tsy mila manontany olon-kafa ianareo mikasika an'izany, mahafantatra marina tokoa ianareo. Manana an'izany eny an-tànanareo ianareo, fantatrareo izay atao. Amena. Fantatrareo ny valiny, fantatrareo fa hisokatra ilay varavarana. Nanamarina an'ireo fanningaina ianareo ary fantatrareo fa izany mihitsy tokoa ilay zavatra marina, hisokatra tokoa ilay varavarana rehefa mampiditra an'ilay fanalahidy ao ianareo.

⁷⁷ Oh, raha manana an'ireo fanalahidy fotsiny mantsy ny fiangonana! Raha manana an'io fanalahidin'ny finoana io fotsiny mantsy ny fiangonana, dia afaka manokatra ny varavarana rehetra isika, ny aretina rehetra, ny loza rehetra, ny toe-javatra rehetra izay misy. Afaka manokatra ho antsika izany raha afaka manana an'io fanalahidy io fotsiny ihany isika. Ity lehilahy ity dia nanana an'ilay fanalahidy ho an'ny antsony.

⁷⁸ Raha hamela fijoroana vavolombelona manokana iray ianareo. Tsaroako teo amin'ny dimy ambin'ny folo, fito ambin'ny folo taona lasa teo izay ankehitriny, mikasika ny, rehefa niteny tamiko ny Tompo tany teo amin'ilay renirano, rehefa nidina tao anatin'io Andry Afo Izay hitanareo ao amin'ny sary io Izy, ary niresaka tamiko Izy ka hoy Izy hoe, "Tsy maintsy mitondra an'ity Hafatra ity manerana an'izao tontolo izao ianao."

Ary tsaroako tany Green's Mill rehefa niresaka tamiko Izy.

⁷⁹ Dia nandeha aho ka niteny tamin'ny pasitera, ary niteny tamiko izy, nanao hoe, "Ry Billy, inona no nohaninao tamin'ny alina? Nanana nofy ratsy iray ianao." Hoy izy hoe, "Mandehana miverina amin'ny asanao. Miasa amin'ny Public Service Company ianao, manana asa tsara, mandehana miverina ary karakarao ny—ny raharahanao, anaka." Hoy izy hoe, "Nanana nofy ratsy iray ianao. Nihinana zavatra iray ianao." Tsy nahaketra ahy izany na ny kely aza!

⁸⁰ Rehefa nanomboka ny asam-panasitranana aho, dia maro aminareeo eto no mahatsiaro ny Hafatro tamin'izany maraina

izany, *Tahaka Ny Nandehanan'I Davida Hihaona Amin'I Goliata*, no notoriako.

⁸¹ Ary niteny tamiko izy ireo, hoy izy hoe, “Ao amin’ny andron’ny siansa moderina, izay ananantsika an’ireo karazana fikarohana ara-pitsaboana rehetra, izay ananantsika ny dokotera tsara indrindra, izay nanadinoin’ny fiangonana ny fanasitranana avy amin’Andriamanitra efa ela sy ny sisa nandrity ny taona maro, maro lasa izay, dia ahoana no handehananaeo eo alohan’ny olom-be iray tahaka an’izany? Ahoana no handrosoanaeo eo anatrehan’ireo Metodista, Batista, Presbyterana, sy ny sisa, ary na ireo Pentekostista aza, izay efa nanadino an’izany efa ela be, ka niditra tao amin’ireo fanekem-pinoany? Ahoana no hanatrehanaeo, tsy misy anarampiangonana na inona na inona hafa hanohana anao? Inona no hataonao, ry Bill?” Na ahoana na ahoana, ny hafa, tsy nahaketra ahy izany na ny kely aza, satria nihazona fanalahidy iray aho teny an-tànako! Hoy aho...Hoy izy ireo hoe, “Tsy hisy olona hino anao. Tsy afaka hanao an’izany ianao. Tsy hisy olona hino anao.”

⁸² Hoy aho hoe, “Tsy ahoako. Misy zavatra anankiray azo antoka; Andriamanitra no niantso ahy, ary tsy maintsy mandeha aho satria Andriamanitra no niantso ahy.” Nihazona an’ilay fanalahidy aho. Izy no niantso ahy, Izy no naneho tamiko, Izy no niteny tamiko, ary nahita Ny Fanatrehany aho rehefa naniraka ahy Izy, ary teo ilay fanalahidy!

⁸³ Hoy ilay pasitera hoe, “Miaraka amin’ny fianarana kilasy fahafito, nefo ianao handeha hitory teny ary hivavaka eo anatrehan’ireo mpanjaka sy ireo mpanapaka!”

Hoy aho hoe, “Araka Ny Teniny izany!”

⁸⁴ Saiky ity fotoana ity tamin’ny taon-dasa, na herinandro iray na roa nialoha, rehefa tonga teto amin’ny fiangonana teto aho ka niteny taminareo fa ny Tompo Andriamanitra dia nanome ahy fahitana iray mba handeha...hanao dia fihazana iray, ary biby anankiray no ho hitako, izay banana tandroka roa amby efapolo inch eo aminy. Ary eo amin’ny lâlana miverina aorian’ny hahazoana an’io biby io (eo amin’izay hipetrahany, ny toerana hisy azy), eo amin’ny lâlana miverina dia hamono bera mara mivolom-bolafotsy iray aho. Ary nandeha tao amin’io fizarana anankiray io aho, ka niresaka tamin’ilay lehilahy, dia hoy izy hoe, “Tsy mahafantatra biby anankiray tahaka an’izany aho. Ary raha mbola bera mara iray, dia tsy mbola nahita anankiray mihitsy aho.”

Hoy aho hoe, “Fa tsy maintsy ho eto izany any ho any.”

⁸⁵ Noho izany dia hoy izy hoe, “Tsy mandeha any amin’ny tanin’ny bera akory aza isika. Mandeha any ho an’ny ondry isika, any amin’ny hazo avo any ambony any.” Eny, nandeha niaraka taminy aho.

⁸⁶ Ary tamin'ny andro faharoa, teo amin'ilay toerana mihitsy, teo amin'izay nolazain'ny Tompo marina tokoa, teo no nипетраhан'ilay biby. Noho izany rehefa nandeha aho ka naka an'ilay biby, ary raha mbola nanendaka ny hoditra sy ireo tandroka sy ny sisa izahay, hiala, dia hoy izy hoe, "Te-hanontany zavatra aminao aho. Niteny tamiko ianao, telo andro lasa izay rehefa isika nandao ny—ny toby, hoe rehefa avy nitifitra an'io biby anankiray io ianao, ka eny amin'ny lаlana miverina dia 'hamono bera mara mivolom-bolafotsy."

Hoy aho hoe, "Izany no HOY NY TOMPO HOE!"

⁸⁷ Hoy izy, "Tsy nisalasala aho," hoy izy, "satria ny rahalahiko dia tratry ny androbe, ary tsy mbola nahita azy mihitsy ianao teo amin'ny fiainanao, rehefa teto ianao indray mandeha, nefà niteny tamiko ianao fa io zazalahy io dia ho sitrana rehefa nanao zavatra anankiray aho. Ary sitrana izy." Hoy izy hoe, "Ankehitriny, saingy, Rahalahy Branham, te-hanontany anao aho," hoy izy, "izaho dia afaka mahita ny rehetra manerana an'io tendrombohitra io hatrany amin'izay misy an'ilay hazo avo, mitsangana ireo soavalý. Nefà tsy misy na inona na inona eo. Tsу misy singan'ahitra iray, tsy misy vatolampy iray, tsy misy na inona na inona." Ombimanga voloina, izay eo amin'ny roa inch eo ny haavony, eo ambonin'ireo hazo avo, eo amin'ny maily iray na mihoatra ambonin'ny hazo avo. Hoy izy, "Aiza no hisy an'ilay bera?"

⁸⁸ Hoy aho hoe, "Andriamanitra dia Jehovah-jire. Raha Izы no niteny tamiko fa hisy bera iray, dia hisy anankiray any."

⁸⁹ Nidina an'ilay tendrombohitra, saiky isaky ny mahavita antsasaky ny maily iray na tahaka an'izany izahay, mihamanakaiky, dia hoy izy hoe, "Rahalahy Branham, saiky fotoana hisehoan'ilay bera izao."

Hoy aho hoe, "Aza manahy, ho eo izy."

⁹⁰ Ary rehefa saiky teo amin'ny dimanjato yards teo amin'izay misy an'ireo soavalý izahay, dia tsy maintsy niala sasatra indray niaraka tamin'ireo tandroka mavesatra sy ny sisa tao andamosinay. Ary njery nanodidina indray izy, dia nahita ny endrin y aho raha njery ahy izy, toy ny hoe nanontany izy tao amin'ny fony lalina tao. Hitanareo, izy dia *nanantena* hoe ho eo izany, saingy tsy nanana an'ilay fanalahidy izy.

⁹¹ Fa na ahoana na ahoana, nohon'ny fahasoavan'Andriamanitra, dia tsy mbola nandiso ahy mihitsy Izы. Rehefa niteny tamiko Izы fa hisy mivolom-bolafotsy iray eo, dia nanana an'ilay fanalahidy aho. Tsу nisalasala an'izany aho na ny kely aza, na ny kely aza. Nitodika tany aminy aho, ary hoy aho hoe, "Bud, ho eo izany." Ary vantany vao nitodika aho, dia teo ilay bera [Elanelana tsy voaraki-peo—Mpand.] nitsangana teo amboninay mihitsy, teo amin'ny antsasaky ny maily teo.

⁹² Napetany ireo solomaso, dia hoy izy hoe, “Billy, mianiana aho, mivolom-bolafotsy goavana iray ilay izy!”

⁹³ Hitanareo, ilay fanalahidy, fahitana iray, ny Tenin’ny Tompo, tsy misy na inona na inona afaka manova an’Izany na manajanona an’Izany. Ny ilain’ny fiangonana izao hariva izao dia tsy fianarana iray. Ny ilain’ny fiangonana izao hariva izao dia tsy anaram-piangonana. Ny ilain’ny fiangonana izao hariva izao dia tsy fanekem-pinoana. Ny ilain’ny fiangonana izao hariva izao dia ilay fanalahidy ho an’ny Soratra, ilay Varavarana. Izany hoe, Kristy no ilay Varavarana, ary Izy no Teny. Ny finoana ao amin’ny Tenin’ilay Andriamanitra velona no manokatra ny varavarana tsirairay.

Andriamanitra, omeo anay ilay fanalahidy. Omeo anay ilay fanalahidy.

⁹⁴ Hebreo, ny toko faha-12, dia manao hoe, “Satria misy vavolombelona maro be toy izany manodidina antsika toy ny rahona, dia aoka isika hanaisotra izay rehetra mitambesatra, sy ny tsi-finoana izay malaky mahazo antsika.” Voalaza hoe “fahotana,” izany hoe, *fahotana* dia “tsi-finoana.” Hitanareo? Anankiray ihany ny fahotana, izany dia ny tsi-finoana.

⁹⁵ Ary ny *fahotana* dia midika hoe “diso an’ilay fikendry.” Tahaka anareo mitifitra, ka diso an’ilay fikendry ianareo, dia tsaratsara kokoa ny manitsy ny basinareo, hitanareo, satria misy zavatra tsy mety ao. Diso an’ilay fikendry ianareo. Hitanareo, miverena ary manandrama indray. Hitanareo? Izany dia midika hoe mihodina, diso an’ilay fikendry ianareo. Rehefa te-ho Kristiana ianareo, ka mandeha mikambana amin’ny fiangonana, dia diso an’ilay fikendry ianareo. Rehefa te-ho Kristiana ianareo, ka nofafazana tamin’ny anaran’ny “ny Ray, Zanaka, Fanahy Masina,” dia diso an’ilay fikendry ianareo. Tsaratsara kokoa ny miverina. Tsy ho eo amin’ilay fikendrena ianareo. Hihahaka ianareo, azo antoka marina tokoa. Zavatra tokana ihany no afaka hihazona anareo ao amin’ny laharana tanteraka, izany dia ny Soratra, ny Baiboly, ny Teny. Satria, ny lanitra sy ny tany ho levona, fa ny Tenin’Andriamanitra tsy ho levona mihitsy.

⁹⁶ Noho izany, hazony ilay fanalahidy, ny finoana ao amin’ny Teny! Ary ny finoana kely rehetra izay inoanareo, ka tsy misalasala na ny kely aza, dia afaka manokatra ny varavarana rehetra izay eo anelanelanareo sy ny fitahiana izay ananan’Andriamanitra ho anareo ianareo. Enga anie Andriamanitra hanampy antsika mba hanana an’ilay fanalahidy, izany no fivavako. Ndao isika hanondrika ny lohantsika ankehitriny ho an’ny tonom-bavaka iray.

⁹⁷ Rainay any An-danitra, misaotra Anao izahay izao hariva izao fa Nomenao fanalahidy iray izahay mba hanokatra ho anay ny famonjena. Izaho—misaotra Anao aho ny amin’izany, Tompo, fa voavonjy izahay, ary noho ilay fanalahidy izay azonay

ampiasaina hatramin'izao. Fa, Andriamanitra, omeo finoana izahay, fa ny tsirairay avy amin'ireo Teny izay voasoratra ato anatin'Ny Bokinao ireo dia faningaina kely anankiray, ary io Fanalahidy izay antsoina hoe Jesosy...io Varavarana io, no tiako ho lazaina, antsoina hoe Jesosy; ary ilay fanalahidy, antsoina hoe finoana, dia mikasika ny Teny tsirairay, manokatra an'izany izy. Izy no mamaha an'ilay faningaina kely ka afaka miditra ao amin'izany fitahiana izany izahay. Ray any Andanitra, omeo anay ireo fanalahidy, mba ahafahanay hanana finoana ao amin'ireo teny fikasan'Andriamanitra, mba tsy hahatonga ny finoanay tsy hahomby, mba ahafahanay hanao asa iray ho Anao sy ho an'ireo izay iarahanay miasa.

⁹⁸ Mamelà ny fahotana rehetra an'ny tsi-finoanay, Tompo, ary ampio izahay mba ho Anao. Manatona ny latabatry ny fandraisana izahay ankehitriny, ary mivavaka aho, Ray any Andanitra, mba Hamelanao anay ny amin'ireo helokay rehetra, mba ahafahanay hiditra ao amin'ny fifalian'ny fiombonana manodidina ny latabatr'Andriamanitra. Mangataka an'izany amin'ny Anaran'i Jesosy izahay. Amena.

⁹⁹ Ry rahalahiko, ranabaviko, raha manana an'ilay fanalahidin'ny Fanjakana ianareo, ilay fanalahidin'ilay Varavarana, ilay fanalahidin'ny famonjena, dia hanampy anareo hanokatra an'ireo varavarana Andriamanitra ary hamela an'i Jesosy hiditra ao. Avelao Izy hanome anareo an'ireo zavatra izay tena—tena irianareo.

¹⁰⁰ Ankehitriny, vetivety fotsiny alohan'ny hanombohantsika hamaky mikasika ny fandraisana, dia te-hilaza zavatra iray aho satria mikasika ny fandraisana izany. Ary rehefa manatona an'ity alitara ity ianareo, dia fomba anankiray ihany no hanatonana, izany dia, raha mihazona an'ilay fanalahidin'ny finoana eny an-tànantsika isika, dia izany no mampahafantatra antsika fa voavela ireo fahotantsika. Ary raha tsy manana an'izany fanalahidy izany isika mba hanokatra an'ilay Varavarana, hoe voavela ny fahotantsika, dia tsy misy na inona na inona ataontsika eo amin'ny latabatry ny Tompo. Satria, izay mihinana sy misotro tsy am-pahamendrehana, dia mihinana sy misotro fanamelohana ho an'ny tenany, tsy mamantatra ny tenan'ny Tompo. Ankehitriny, marina izany.

¹⁰¹ Heveriko fa isika rehetra dia mahafantatra fa androany dia Androm-Pirenena ho an'ny Fandraisana. Ity no andro izay anaovan'ny fiangonana rehetra fandraisana. Izao no Androm-Pirenena ho an'ny Fandraisana manerana ny firenena. Ary nieritreritra aho fa ho mety tsara ny hiresahana teny iray na roa mikasika ny fandraisana alohan'ny hanaovantsika azy, raha mbola ny pasitera, raha sitrany, hanomana ny Soratra ho an'ny famakiana ny—ny lamin'ny latabatry ny Tompo. Ankehitriny, ity fandraisana ity... Ankehitriny, tsy haka afa-tsyo eo amin'ny folo minitra eo fotsiny aho.

¹⁰² Ity fandraisana izay hataontsika ity, no efa fifamaliana lehibe indrindra an'ny foto-pampianarana ao amin'ny Baiboly. Izany dia ny...anankiray tamin'ireo fifamalian'izy ireo voalohany tao amin'ilay fiangonana voalohany. Ary amin'izao andro izao ny Protestanta, ny Episkopaliana sy ireo Metodista, ary ny maro amin'ireo fiangonana Protestanta, no hanaiky am-pifaliana ny foto-pampianarana Katolika, Katolika Romana, raha afaka mihoatra an'ilay vona kelin'ny fandraisana izy ireo. Saingy hifanaraka izy ireo fa ny pretra dia tokony hanambady ary ho mpitoriteny, nifanaraka teo amin'izany imbetsaka ny fiangonana Katolika tao amin'ireo kanferansa sy fivoran'izy ireo. Mifanaraka eo amin'izany izy ireo. Ary izy ireo dia hifanaraka eo amin'ireo vavaka samihafa, sy ny sisa, hifanaraka eo amin'izany ny fiangonana Protestanta. Ary ny katesisma sy ny sisa, ilay alitara kely eto sy etsy, ary ny fiangonana Katolika dia manaiky hanao an'izany. Fa rehefa tonga eo amin'ny fandraisana ilay izy, dia eo izy ireo no neparitaka. Ny rehetra izay hany namaky tantara dia mahafantatra an'izany. Fa, mazava ho azy, amin'ny fomba fisainako, dia tokony hanala betsaka izy ireo, alohan'ny izaho—ahafahako manaiky an'izany, hitanareo, satria tsy ara-Baiboly izany.

¹⁰³ Fa tiako ianareo hilaza zavatra anankiray amin'ny fiangonana Katolika. Fantatrareo ve fa ny fiangonana Katolika, tany am-boalohany, dia ilay fiangonana pentekotista apostolika? Izany marina tokoa! Izany ilay fiandohana voalohan'ny fiangonana. Ary hitanareo hoe aiza izy ireo—aiza no nahatongavan'izy ireo, nanohy nanaisotra ny Teny izy ireo ary nanatsofoka dogma iray.

¹⁰⁴ Ary raha hisy mandritry ny zato taona iray hafa ny fiangonana Pentekotista, dia hanalavitra kokoa ny Baiboly noho ny fiangonana Katolika amin'izao andro izao izy, amin'ny fandehanty ankehitriny.

¹⁰⁵ Izany dia nila ho an'ny fiangonana Katolika an-jato taonany, maro mba hanalavitra an'Izany, telon-jato taona, nanomboka tany amin'ilay fiangonana voalohany ka hatramin'ny nandaminana ny fiangonana Katolika Romana, izay nanombohan'izy ireo. Ary nahatratra izy ireo, nampiditra an'ireo manan-kaja sy ny sisa, ka nesorin'izy ireo *ity* dia nampidiriny *ity*, ary nanaisotra an'*ity* dia nanangana an'*itsy*, ka nampidina ny fanompoan-tsampy ary nanangana sarivongana Kristiana, sy ny sisa, ary nanao marimaritra iraisana teo amin'Izany fotsiny mandra-pahatongan'izy ireo eo amin'izay misy azy ireo ankehitriny, ilay fiangonana Katolika Romana.

¹⁰⁶ Ary ny fiangonana Protestanta Pentekotista hatramin'ireo—ireo dimampolo taona izay nisiahy, ary izay nahalavony avy teo amin'ny nanombohany, dia ho endrika ratsy kokoa noho ny fiangonana Katolika izy, ao anatin'ny zato taona manomboka izao. Marina izany. Teny henjana iray ho lazaina izany, saingy

jereo fotsiny hoe avy taiza no nahalavoan'izy ireo. Niditra tao anatin'ny rafi-pandaminana avy hatrany izy ireo, nanao marimaritra iraisana teo amin'ity sy *itsy* mihitsy izy ireo, sy ny zavatra hafa. Ary teo izy ireo no lasa, hitanareo, nandeha niverina mihitsy.

¹⁰⁷ Fa, ny *fandraisana*, izany dia antsoina hoe “ny sakafo harivan’ny Tompo.” Ankehitriny, olona maro, izy ireo dia te-handray an’izany amin’ny maraina. Tsy voalaza ao anaty Baiboly izany hoe Ny *sakafo marainany*. Ary ahoana fa ireo olona amin’izao andro izao ireo, ahoana no mbola ahafahan’izy ireo milaza foana hoe “sakafo harivan’ny Tompo,” nefä tsy manao izy ireo. Nesorin’izy ireo ny *sakafo hariva*, ary navelany izany, ka niantso an’ilay izy hoe “sakafo,” fahadalana. Sakafo hariva!

¹⁰⁸ Ankehitriny, izany dia fifamaliana iray foana tamin’ny andron’ny Baiboly, fifamaliana iray ilay izy tamin’izany. Tsy azon’ny olona tsara ny sakafo harivan’ny Tompo. Rehefa manatona ny latabatra izy ireo, i Paoly no niteny tamin’ireo Korintiana, tonga izy ireo ary lasa mamo eo amin’ny latabatry ny Tompo. Hitanareo, tsy azo tsara mihitsy ilay izy tamin’izany. Hoy izy hoe, “Raha te-hihinana ianareo, dia mihinàna any an-trano.”

¹⁰⁹ Ary zavatra hafa iray, tsy azo tsara izany, izay naha-izy azy. Ireo mpanota, sy lehilahy miaina ao anatin’ny fahotana, dia tonga ka nandray ny fandraisana. Ary tsy azo tsara izany. Lehilahy iray miara-miaina amin’ny reniny, reny keliny, ary niteny taminy nikasika an’izany ny fiangonana; fa mbola manao ny fandraisana eo amin’ny latabatra foana izy.

¹¹⁰ Ary nisy fizarana teo anivon’izy ireo, nefä mbola nandray ny fandraisana foana izy ireo. Hoy izy hoe, “Azoko fa ianareo dia mandeha tahaka ny sisa amin’ireo Jentilisa. Ary misy—misy fisarahana eo anivonareo, tahaka ny misy any—any amin’ny tranon’ny Kefasy indrindra, sy ny sisa.” Hoy izy hoe, “Ianareo dia mandeha tahaka ny sisa amin’ireo Jentilisa.” Hitanareo, tsy azo tsara izany.

¹¹¹ Ny fandraisana dia efa tsy azo tsara foana. Ankehitriny, afaka manohy eo amin’izany mandritry ny ora maro aho, saingy tokony hanao an’ity fandraisana ity sy ny fanasan-tongotra isika. Ankehitriny izy ireo dia namela tanteraka ny fanasan-tongotra, afa-tsý anaram-piangonana vitsivitsy. Maro amin’ireo Pentekotista no nanalavitra tanteraka an’izany. Hitanareo? Nefä mbola ao anaty Baiboly foana izany tahaka ny nanoratana azy mihitsy. Hitanareo?

¹¹² Ankehitriny, i Roma dia tsy miantso an’izany hoe “fandraisana.” Izy ireo dia miantso an’izany hoe “lamesa, lamesa masina izany.” Tsy manao fandraisana izy ireo, manao lamesa izy ireo. Lamesa iray izany, ary ny lamesa dia maka marina tokoa ny tena dikany avy amin’ny hoe fandraisana. Ny *lamesa* iray dia midika hoe “fanantenana.” Manao lamesa iray izy ireo,

manantena (fa eo am-panaovana an'izany ao amin'ny lamesa) dia hamela azy ireo amin'ny fahotany Andriamanitra, amin'ny fandraisana "ny vatan'i Kristy ara-bakiteny, izay avadiky ny pretra ho ilay Vatana sy ny Ràn'i Kristy," mandray an'izany, manantena fa havelan'Andriamanitra ny fahotan'izy ireo eo am-panaovana an'izany. Lamesa iray izany.

¹¹³ Ireo Protestanta dia miantso an'izany hoe "fandraisana." Ny fandraisana dia midika hoe "fisaorana." Fa ny Protestanta... Ny Katolika dia manao lamesa iray, ao amin'ny lamesa dia manantena fa mamela azy ireo amin'ny fanao ratsiny Andriamanitra. Ny Protestanta dia manao an'izany miaraka amin'ny fisaorana noho izay efa vita tamin'ny fifandraisana tamin'Andriamanitra; mifandray Aminy, hoe efa vita izany. Ny Katolika dia manantena fa vita izany; ny Protestanta milaza hoe efa vita izany. Ny Katolika dia manontany raha voavela ny fahotany; ny Protestanta miaiky fa voavela izy ireo, hoe afaka izy. Ary ny fandraisana dia mifandray amin'Andriamanitra. Ary ireto lahatsoratra izay raisintsika ireto, tsy hoe amin'ny *fanantenana* fa voavela ny fahotsitsika, fa izy ireo *dia* voavela. Satria izany... Ny anankiray dia fanantenana; ary ilay anankiray hafa dia finoana. Ny anankiray manantena fa marina ny azy; ary ilay anankiray hafa mahafantatra fa marina ny azy. Hitanareo? Ny anankiray hafa, ny anankiray dia manantena, satria tsy fantany izay ijoroany; ilay anankiray hafa dia mahafantatra fa marina ny azy, satria fantany izay nolazain'Andriamanitra. Izay ilay izy. Izany ilay fahasamihafana. Noho izany, rehefa manantena fotsiny ianareo, dia mitandrema; fa rehefa mahafantatra ianareo, amin'izay fotoana izay dia mandrosoa. Hitanareo, amin'izay fotoana izay dia ao amin'ny fifandraisana amin'Andriamanitra ianareo. Ny Protestanta dia, milaza izy fa voavela ary fantany izany; ny Katolika dia manao lamesa, manantena fa ho voavela izy. Ilay izy dia tahaka an'izao fotsiny: ny anankiray dia mpangataka, manantena fa mety tsara ny zavatra rehetra, hitanareo; ilay anankiray hafa dia mpangataka iray misaotra noho izay efa vita. Samy mpangataka izy roa ireo. Saingy ny anankiray dia mangataka, manantena fa hahazo an'izany izy; ilay mpangataka hafa dia mahafantatra fa manana an'izany izy, ary nisaotra Azy nohon'ny nanomezana an'izany ho azy. Ankehitriny, eo ilay fahasamihafana. Izany no fandraisana. Eny, tompoko. Ny anankiray manantena fa voavela izy; ilay anankiray hafa dia mahafantatra fa voavela izy, ary manome saotra ny amin'izany.

¹¹⁴ Noho izany, ny fandraisana dia ho an'ny Kristiana izay nateraky ny Fanahin'Andriamanitra indray. Ary ny *nateraka indray* dia tsy tena midika loatra ankehitriny fa hoe manana ny Fanahy Masina ianareo. Tsarovy ankehitriny. Ankehitriny, maro no mampianatra an'izany. "Tsy mahafantatra olona mampianatra azy tahaka an'izao aho," tahaka ny nolazain-

dRahalahy Arganbright antitra tamin'io hariva io avy tetra amin'ny polipitra teto, hitanareo. Fa, ny fahateraham-baovao dia tsy ny batisan'ny Fanahy Masina. Tsy manohana an'izany ny Soratra, tsy mihevitra aho, hitanareo, amin'ny fomba fahitako azy. Hitanareo? Mino aho fa ianareo dia nateraka indray...

¹¹⁵ Ary izany no antony ampiasaiko ny teny hoe batisa amin'ny Anaran'i Jesosy Kristy, fa tsy ho an'ny fanavaozana. Ankehitriny, ny Pentekotista, ny fiangonana Pentekotista Mitambatra, dia manao batisa amin'ny Anaran'i Jesosy Kristy ho an'ny fanavaozana. Tsy mino an'izany aho. Ary afaka manao an'izany izy ireo raha tiary. Fa izaho dia mino fa hoy i Petera hoe, "Mibebaha," aloha. Tsy mamela ny fahotana ny rano. Ny Fianganan'i Kristy dia mitory an'ilay izy tahaka an'izany. Saingy izaho dia mino fa ny fibebahana, nenina araka an'Andriamanitra; *mibebaka* dia midika hoe "mihodina, miverina," diso an'ilay fikendry ianareo, "manomboka indray." Ataovy aloha izany! Ary ny batisanareo amin'ny rano dia asa ety ivelany fotsiny an'ny zavatra izay efa vita ao anatinareo, hoe nanaiky an'i Kristy ho Mpamonjinareo ianareo.

¹¹⁶ Heveriko fa ny fiangonana fotsiny no eto izao hariva izao, araka ny fantattro, tsy eto matetika aho hahafantatra hoe iza no tonga na tsy tonga. Nahazo tsikera kely aho teto vao tsy ela akory izay ny amin'ny nanaovana batisa lehilahy iray teto tao amin'ny dobo, lehilahy antitra iray. Ary nanatona azy aho, lehilahy antitra tsara iray izy. Nanana tombontsoa aho tamin'ny fitarihana ny fianakaviany manontolo ho eo amin'i Kristy, Kristiana izy rehetra. Ity lehilahy antitra ity dia lehilahy antitra mahafinaritra, ary tiako izy, noho izany dia nanatona azy aho ary hoy aho taminy hoe, "Papa, nahoana ianao no tsy lasa Kristiana iray?" Tia ahy izy.

¹¹⁷ Hoy izy hoe, "Rahalahy Branham, te-ho lasa Kristiana iray aho rehefa afaka ny ho tsara kokoa."

¹¹⁸ Hoy aho hoe, "Teneniko aminao izay ataonao, Papa. Jereo ny manodidina mandra-pahitanao hoe aiza no ahafahanao ho tsara kokoa, avy eo dia teneno amiko hoe aiza izany toerana izany, izaho dia te-ho any, ihany koa." Hoy aho hoe, "Kristy dia tsy tonga mihitsy mba hamonjy olona tsara. Tonga Izy mba hamonjy olona ratsy." Rehefa mieritreritra ianareo fa tsara, amin'izay fotoana izay dia tsy tonga mba hamonjy anareo Izy. Izy dia tonga mba hamonjy an'ireo izay Fantany fa ratsy. Hitanareo? Maty Kristy mba hamonjy ny mpanota. Hitanareo? Ary hoy aho hoe, "Papa, misy tsipika iray mihitsy eto."

Hoy izy, "Eny, mifoka an'ireny sigara ireny aho."

Hoy aho hoe, "Tsy hiresaka momba azy ireo akory aza aho."

Hoy izy, "Niezaka aho ny hiala amin'izy ireo, Rahalahy Branham."

Hoy aho hoe, "Eny àry, tsy hiresaka momba ny sigara isika."

Hoy izy, “Eny, rehefa afaka aho . . .”

¹¹⁹ Hoy aho hoe, “Aza, aza miresaka momba azy ireo intsony, avelao any izy ireo. Te-hametraka fanontaniana iray aminao aho.”

Hoy izy, “Eny àry, inona ilay izy?”

Hoy aho hoe, “Mino ve ianao fa misy Andriamanitra iray?”

¹²⁰ Hoy izy, “Izany tokoa, mino an’izany aho.” Hoy izy, “Mino an’izany mafy tokoa tahaka anao aho, heveriko, Rahalahy Branham.”

¹²¹ Hoy aho hoe, “Mino ve ianao fa io Andriamanitra iray io ihany dia nihoatra ny Fetrany ary tonga nofo ka nonina teo anivontsika tao amin’ny vatan-tenan’i Jesosy Kristy, mba hamonjy ny olona?”

Hoy izy, “Eny, mino an’izany aho.”

“Ary maty Izy mba hamonjy an’ireo mpanota tahaka anao sy tahaka ahy?” Hitanao?

“Eny, mino an’izany aho.”

¹²² Hoy aho hoe, “Ankehitriny, tahaka an’izany mihitsy ilay izy. Isika rehetra dia ao anatin’ny tranobe goavana anankiray eto, ary ao anaty fonja isika, ary izaho dia tsy afaka mijoro eto amin’ity zorony ity ka hanao hoe ‘ity no hanampy ahy hivoaka ny fonja,’ raha mijoro etsy amin’ny zorony etsy aho ka hanao hoe ‘itsy no hanampy ahy hivoaka ny fonja,’ ao anatin’ny kizo iray ihany isika. Ary ny olona tsirairay izay teraka teto amin’ity izao tontolo izao ity dia teraka tao amin’ny ota, notorotoronina tao amin’ny heloka, tonga eto amin’izao tontolo izao milaza lainga. Jiolahimboto iray izy, eo am-panombohana.”

¹²³ Olona iray no nanontany ahy indray andro, hoy izy hoe, “Rahalahy Branham, raha . . . hisy fahasamihafana anankiray ve eo amin’ny Adama sy Eva, ary ireo zanany androany, raha nitanjaka izy ireo, nandeha tao amin’ny . . . Hi-hitovy ve ny vatan’izy ireo?”

¹²⁴ Hoy aho hoe, “Tsia, tompoko.” Nody tany an-trano taorian’ny fihazana vontsira izahay, izaho sy Rahalahy Fred, ary andiany iray tamin’izy ireo. Hoy aho hoe, “Tsia, tsy hitovy izy ireo.”

¹²⁵ Hoy izy, “Ny tianao lazaina ve dia hoe tsy ho vehivavy iray tahaka an’ireo zananivavy i Eva, ary tsy ho lehilahy iray tahaka an’ireo zananilahy i Adama?”

Hoy aho hoe, “Amin’ny antsipiriany maro, fa tsy amin’ny antsipiriany rehetra ara-batana.”

Hoy izy, “Ho inona ilay fahasamihafana?”

¹²⁶ Hoy aho hoe, “Tsy nanana foitra izy ireo. Noforonina izy ireo. Marina. Tsy nifatotra tamin’ny inona na inona izy ireo.”

¹²⁷ Raha mbola mikasika ny zavatra izay teraka eto amin'ity izao tontolo izao ity foana izany, dia maneho fa jiolahimboto iray izy, eo am-panombohana. Marina izany. Hoy aho hoe, "Azo antoka, misy fahasamihafana iray. Tsy nanana foitra izy ireo. Tsy nifandray tamin'ny vavy anankiray izy ireo, hahatongavana eto." Hitanareo, Andriamanitra no namorona azy ireo.

¹²⁸ Ankehitriny, hoy aho hoe, "Te-hiteny zavatra anankiray aho. Ny olona tsirairay ato amin'ity tranon'ny tranomaizina ity, iza no masina? Iza no anankiray izay tsy teraka tamin'ny fananahana? Iza no anankiray afaka hanampy ny hafa, tsy mampaninona izay maha-izy azy? Isika rehetra dia ato anatin'ity tranomaizina iray ihany ity. Fa Andriamanitra dia nanao ny Tenany ho anankiray amin'ireo Famoronany ary tonga tany ivelan'ny fananahana, tamin'ny alàlan'ny Rà masina izay Noforoniny Izy tenany, ary tamin'ny alàlan'io Rà io no Nanavotany antsika." Hoy aho hoe, "Mino an'izany ve ianao, Papa?"

Hoy izy, "Mino an'izany aho."

¹²⁹ Hoy aho hoe, "Kristy dia maty ho an'ny olona ratsy tahaka anao. Ankehitriny, fomba tokana ihany no hatao. Tsy misy na inona na inona azonao atao. Izy no manolotra an'izany ho anao. Tsy mendrika an'izany ianao. Tsy misy na inona na inona azonao atao hahazoana an'izany. Izy fotsiny no manome an'izany ho anao. Hanaiky an'izay Nataony ho anao ve ianao, hihazona anao tsy ho any amin'ny helo?"

¹³⁰ Hoy izy hoe, "Hanaiky an'izany aho." Hoy izy, "Saingy raha afaka miala amin'ireto sigara ireto fotsiny aho."

¹³¹ Hoy aho hoe, "Hisahana ny tenany ireo sigara. Ianao fotsiny... Tsy hanontany anao aho. Tsy mpanaraka lalàna aho. Mino ny fahasoavana aho. 'Fa izay rehetra nomen'ny Ray Ahy no hanatona Ahy.'" Hoy aho hoe, "Raha mino an'izany amin'ny fonao rehetra ianao!"

Hoy izy, "Amin'ny foko rehetra, no inoako an'izany."

¹³² "Noho izany dia hanaiky an'izany eo amin'ireo fototra ireo ve ianao, hoe tsy mendrika an'izany ianao, fa Izy no Anankiray izay mendrika. Aza mijery ny tenanao; mijere Azy, satria tsy afaka manao na inona na inona ho an'ny tenanao ianao. Mijere an'ilay Anankiray izay nanao zavatra ho anao. Ahoana ny Aminy?"

"Oh," hoy izy, "Izy no mendrika."

Hoy aho hoe, "Izay ilay izy, noho izany dia ekeo izay Omeny anao."

Hoy izy, "Manaiky aho."

¹³³ Ary nataoko batisa tamin'ny Anaran'i Jesosy Kristy izy. Dia nivoaka teto izy ary nandrehitra sigara iray.

¹³⁴ Herinandro vitsy lasa izay dia nandeha tany an-trano fonenany aho. Nahita fahitana iray aho indray hariva, ny amin'ny hazo iray maitso mandava-taona izay notapahina, niongana. Nahita hazo fisaka voafantsika teo amin'izany aho. Teo akaikin'ilay hazo farany mihitsy dia nisy hazo fisaka iray niavaka. Ary teo ambanin'io hazo fisaka io, teo amin'ny farany ambany mihitsy, dia nifarana tahaka an'izao, vaky teo mihitsy ilay hazo. Ary hoy ny Feo iray hoe, "Tokony ho ianareo izany," na, "Ho ianareo izany." Ary nianjera i Papa Cox, torotoro ny lamosiny *teto*. Ary noho izany ny ampitso maraina dia nentin'izy ireo teo aminy ireo sigarany rehefa teo am-pandriana izy, niala taminy ilay faniriana. Herinandro maro lasa! Tsy nanandrana anankiray mihitsy izy, tsy mila anankiray akory aza izy na inona na inona hafa. Hitanareo? Ary nahita azy aho vao tsy ela akory izay, rehefa lasa volontany fotsiny nanerana ny tānany rehetra, herinandro vitsy lasa izay, nohon'ny sigara, ary ankehitriny izy dia tsy afaka mahatanty anankiray akory aza manodidina azy. Apetraho aloha ireo zavatra voalohany! Aza manandrana ny ho lasa tsara; ratsy ianareo, eo am-panombohana, ary tsy misy na inona na inona azonareo atao. Misy tsipika manasaraka iray, ary ny olombelona rehetra dia eo amin'io lafiny io.

¹³⁵ Ankehitriny, rehefa teraka teto amin'ity izao tontolo izao ity aho, dia tao amin'ny voadim-panambadiana masina iray izany, teo amin'ny raiko sy ny reniko; tao an-kibony dia nisy atody iray, tao amin'ireo glandin'ny raiko dia nisy selan-drà iray. Ny aiko dia avy amin'io selan-drà io (fa tsy avy amin'ny atodin'ny reniko), avy amin'ny selan-dràny'ny raiko. Ary rehefa nuditra tao amin'ny toerana mety hihalonana amin'ilay atody io selan-drà io, rehefa nihaona izany, dia nobaikon'Andriamanitra ny natiora hanome vatana iray ho ahy. Ary avy eo dia teraka aho tamin'izay fotoana izay tao amin'ny taranak'olombelona, nomena fanararaotra iray aho mba—mba ho lasa olona manantsaina tahaka ny olombelona rehetra, izay ahafahako mamily fiarakodia, na ahafahako manao an'ireo zavatra tahaka ny ataon'ny olombelona, mandeha, miresaka, mamily fiarakodia, sy ny sisa. Nomena an'izany aho, satria teraka tao amin'ny fianakavian'olombelona, ary nomena herin'ny fahaizana mba ho olombelona.

¹³⁶ Ankehitriny, rehefa teraka tao amin'ny fianakavian'Andriamanitra aho, dia tonga tamin'ny alàlan'ny Rà aho, ny Rà no manome Aina ho ahy. Ary avy eo rehefa lasa velona ao amin'i Kristy aho, dia Izy no nanao batisa ahy tamin'ny Fanahy Masina sy ny hery, mba ho zanakalahin'Andriamanitra iray. Ankehitriny, tahaka ny ahafahako mandeha fotsiny, miresaka tahaka ny olombelona iray, mamily ny fiarakodia tahaka ny olombelona. Ankehitriny rehefa mandray ny Fanahy Masina aho, dia mandray ny hery handroaka devoly, hiteny amin'ny

fiteny vaovao, hitory ny Filazantsara, hanasitrana ny marary. Vita batisa aho! Tsy hoe teraka; fa natao batisa!

Niangona tao amin'ny efitra ambony izy ireo,
Ny rehetra nivavaka tamin'Ny Anarany,
Izy ireo dia vita batisa tamin'ny Fanahy Masina,
Sy hery satria tonga ny asa.

¹³⁷ Amena. Mino ny Fiainana Mandrakizay ianareo, ary nateraka indray tamin'ny alàlan'ny finoanareo. Jesosy no nilaza, ao amin'ny Masindahy Jaona 5:24 hoe, "Izay mandre Ny Teniko ka mino Izay naniraka Ahy, no manana fiainana mandrakizay," tsy ny Fanahy Masina, manana fiainana mandrakizay fotsiny. Teraka tao amin'ny fianakavian'Andriamanitra izy. Ary avy eo dia vita batisan'ny Fanahy Masina, miaraka amin'ny herin'ny fahaizan'ny finoana, mba hino ny Filazantsara ary hanao Azy hiasa sy hanao Azy hihetsika marina. Amena. Amin'izay fotoana izay dia mihetsika tahaka ny zanakalahin'Andriamanitra izy. Amin'izay fotoana izay dia afaka mandroaka devoly izy. Hoy Jesosy hoe, "Izao famantarana izao no hanaraka azy ireo!" Hitanareo? "Amin'Ny Anarako izy ireo dia handroaka devoly, hiteny amin'ny fiteny vaovao, handray menarana, hisotro zavamahafaty." Hitanareo, mandray ny herin'ny Fanahy Masina izy, mba hanao an'ireo zavatra ireo.

¹³⁸ Ankehiririny, rehefa lasa Izy, dia hoy Izy hoe, "Mahatsara Ahy ny Handehanako. Satria, raha tsy mandeha Aho, dia tsy ho tonga ny Fanahy Masina." Hitanareo? Noho izany rehefa tonga Izy, dia handresy lahatra an'izao tontolo izao ny amin'ny ota Izy, ka hampianatra ny fahamarinana, ary haneho anareo an'ireo zavatra izay ho avy (izany dia ireo fahitana). "Handray an'ireo zavatra izay Nampianariko anareo Izy, ary hanambara azy ireo aminareo." Ireo tena Teny izay Nahatongavany... Tsy misy olona afaka mahazo ny Teny raha tsy manana ny batisan'ny Fanahy Masina. Ary rehefa miteny ny olona iray fa manana ny batisan'ny Fanahy Masina izy, nefo mifamaly fa tsy marina ny Teny, dia misy zavatra tsy mety ao.

¹³⁹ Paoly dia mpitsikera ny Testamenta Vaovao. Izany dia tsy, tsy mbola voasoratra ny Testamenta Vaovao. Paoly dia mpitsikera ny Kristianisma, Saoly. Fa rehefa nandray ny Fanahy masina izy, dia nandeha tany Azia telo taona ary nandinika ny Soratra, satria nampianarina teo ambanin'i Gamaliela izy, mpampianatra malaza iray. Avy eo rehefa niverina izy, ary efatra ambin'ny folo taona taty aoriana, dia niakatra izy mba hihaona amin'i Petera tany Jerosalema, ary nahita fa izy ireo dia Teny amin'ny Teny an'ilay Filazantsara iray ihany. Ilay Andriamanitra iray ihany izay nampitory teny an'i Petera tamin'ny andron'ny Pentekosta sy niteny tamin'izy ireo mba hibebaka ka hatao batisa amin'ny Anaran'i Jesosy Kristy, no ilay Fanahy Masina iray ihany izay nanambara an'izany tamin'i Paoly, ary niteny tamin'izy ireo izy ao amin'ny Asa 19 rehefa avy

natao batisa indray mandeha tamin'ny alàlan'i Jaona izy ireo, nanao hoe, "Tsy maintsy atao batisa indray ianareo, amin'ny Anaran'i Jesosy Kristy." Hitanareo?

¹⁴⁰ Hitanareo, ny Fanahy Masina dia mijanona tsara amin'ny Soratra mihitsy. Ny finoany an'Izany no manokatra ny zavamiafina tsirairay. Amena. Hoy ny Baiboly, ao amin'ny Jaona Voalohany 5:7 hoe, "Misy telo izay manambara, any An-danitra: ny Ray, ny Teny (izay Kristy), ary ny Fanahy Masina. Ireo telo ireo dia Iray." "Ary misy telo izay manambara eto an-tany: rano, Rà, Fanahy. Ireo telo ireo dia tsy iray, fa mifanaraka ao amin'ny anankiray izy ireo." Ankehitriny, tsy afaka manana ny Ray ianareo raha tsy manana ny Zanaka, tsy afaka manana ny Zanaka ianareo raha tsy manana ny Fanahy Masina; Iray izy ireo. Saingy ianareo dia afaka ny ho nohamarinina fa tsy nohamasinina, ary afaka ny ho nohamasinina fa tsy manana ny Fanahy Masina. Ny fanamasinana dia amin'ny alàlan'ny Rà, amin'ny alàlan'ny Rà no tonga ny Aina. Hitanareo? Ary ny Fanahy Masina dia ny herin'Andriamanitra, hitanareo, ny hery izay nomena ny fiangonana.

¹⁴¹ "Ianareo handray" (inona?) "hery," Asa 1:8, "aorian'izany dia tonga eo aminareo ny Fanahy Masina. Ianareo handray hery!" (Tsy hoe "hateraka indray ianareo.") "Ianareo handray hery rehefa tonga eo aminareo ny Fanahy Masina. Amin'izay fotoana izay dia Vavolombeloko ianareo any Jerosalema, Jodia, ary Samaria, hatrany am-paran'ny tany." Hitanareo? Ianareo handray hery rehefa avy mandray ny Fanahy Masina. Fa tsy maintsy mandray ny Fanahy Masina aloha ianareo, ary izany dia ny herin'Andriamanitra, hitanareo, mba haneho sy hampiseho. Ianareo dia—ianareo dia... tahaka ny naha-olombelona anareo, ka nianatra niresaka sy nandeha ary nanao an'ireo zavatra izay ataon'ny olombelona iray; rehefa vita batisan'ny Fanahy Masina ianareo, dia nomena hery mba hihetsika tahaka ny zanakalahy sy zanakavavin'Andriamanitra. Tsy mahagaga ny olona raha mihetsika sy manao ny fanaon'izy ireo amin'izao andro izao, tsy nefenoina ny Fanahy Masina mihitsy izy ireo. Raha izany izy ireo, dia ho nihetsika hafa. Mihambo izy ireo fa manana, saingy hoy Jesosy hoe, "Ny voany no hamantaranareo azy ireny." Noho izany dia ahoana no ahafahanareo manao an'izany, hitanareo, mikorontana fotsiny ny rehetra. Hitanareo? Saingy miverena amin'ireo zava-misy!

¹⁴² Ankehitriny, raha mandeha mahitsy ianareo ka milaza ny tenanareo ho Kristiana iray, dia manasa anareo izahay izao hariva izao ho eo amin'ny latabatry ny Tompo. Androany, tsy isalasalana, fa ny fandraisana dia atao manerana ny firenena, ny sasany amin'izy ireo amin'ny fomba anankiray ary ny sasany amin'ny iray hafa. Saingy mieritreritra aho fa ny fomba tsara indrindra anaovana an'izany dia ny manaraka ny Soratra,

amin'ny fomba izay nanaovan'izy ireo azy fotsiny ao amin'ny Soratra. Mieritreritra aho fa izay dia ho ampy.

¹⁴³ Manana ny Baibolinao ve ianao, Rahalahy Neville? Rahalahy Neville ankehitriny no hamaky ny Soratra. [Hoy Rahalahy Neville hoe, “Ao amin’ny toko faha-11-n’ny Korintiana Voalohany, manomboka amin’ny andininy faha-23,” ary mamaky an’izao Soratra manaraka izao—Mpand.]

[*Fa izaho efa nandray tamin’ny Tompo izay natolotro anareo kosa, Fa ny Tompo Jesosy tamin’ny alina iny izay namadihana azy dia nandray ny mofo:*]

[*Ary rehefa nisaotra izy, dia novakiny izany, ka hoy izy hoe, Raiso, hano; ity ny tenako, izay novakina ho anareo: ataovy izao ho fahatsiarovana ahy.*]

[*Dia toy izany ihany koa ny nandraisany ny kapoaka, rehefa nihinana izy, nanao hoe, Ity kapoaka ity no fanekena vaovao amin’ny ràko: ataovy izao, na oviana na oviana ianareo no hisotro an’izany, ho fahatsiarovana ahy.*]

[*Fa na oviana na oviana ianareo no hihinana an’ity mofo ity, sy misotro an’ity kapoaka ity, dia manambara ny fahafatesan’ny Tompo ianareo mandra-pihaviny.*]

[*Koa na iza na iza no hihinana an’ity mofo ity, sy hisotro an’ity kapoaky ny Tompo ity, tsy am-pahamendrehana, dia ho meloka ny amin’ny tena sy ny rân’ny Tompo.*]

[*Fa aoka ny olona hamantatra ny tenany, dia aoka izy hihinana an’izany mofo izany, sy hisotro an’izany kapoaka izany.*]

[*Fa izay mihinana sy misotro tsy am-pahamendrehana, dia mihinana sy misotro fanamelohana ho an’ny tenany, raha tsy namantatra ny tenan’ny Tompo.*]

[*Fa noho izany dia maro no marofy sy marary eo anivonareo, ary maro no nodimandry.*]

[*Fa raha hitsara ny tenantsika isika, dia tsy hotsaraina.*]

[*Fa rehefa tsaraina isika, dia faizin’ny Tompo, mba tsy hohelohina miaraka amin’izao tontolo izao.*]

[Hoy Rahalahy Neville hoe, “Ny Tompo anie hitahy ny famakiana Ny Teniny.”]

¹⁴⁴ Izany dia zavatra iray masina foana, zavatra iray tena masina, heveriko fa tokony hanondrika ny lohantsika isika ankehitriny ao anatin’ny vavaka mangina. Mivavaha ho ahy, izaho hivavaka ho anareo. Ndaو isika hifampivavaka, mba hamindran’Andriamanitra fo amintsika olombelona tsy

mendrika izay eo am-pizarana an'ity sakramenta lehibe ity ho fahatsiarovana ny fahafatesan'ny Tompontsika.

¹⁴⁵ [Mianto ho an'ny vavaka mangina Rahalahy Branham. Elanelana tsy voaraki-peo—Mpand.] Izao vavaky ny fiaikena izao no atolotray ho Anao, ry Rainay, eo ambonin'ny Alitaranao volamena, miaraka amin'ny Fanatitray, ny Tompo Jesosy. Mangataka an'izany amin'Ny Anarany izahay. Amena.

¹⁴⁶ Ankehitriny dia mino aho fa handray ny toerany ireo loholona, ary izy ireo dia... an'ny fiangonana, ary hitondra ny olona izy ireo arakaraky ny handrosoany, isaky ny laharana, ho an'ny fandraisana. Mieritreritra an'izao hira izao foana aho:

Ry Zanak'ondry malala teo am-pahafatesana, Ny
Rànao sarobidy
Dia tsy hahavery ny Heriny mihitsy,
Mandra-pahatongan'ilay
Fiangonan'Andriamanitra navotana rehetra
Ho voavonjy, tsy hanota intsony.

Ndao isika hanondrika ny lohantsika.

¹⁴⁷ Ray Mpiahy sy Masina, Jehovah, ilay Tsitoha lehibe, alefaso eo amin'ny Olonao ireo Fitahianao raha miandry izahay. Mamelà ny fahotanay. Ary ankehitriny izahay dia manolotra Anao an'ity sakramenta ity, ity divay ity, ireo voaloboka izay naniry, ka ny tânан'ireo mpitoriteny no nanosihosy an'ity niaraka. Ary izany dia namboarina ho divay ho an'ilay antony izay itondranay azy Aminao ankehitriny, mba ahafahan'izany haneho aminay ny Ràn'ny Jesosy Kristy Tomponay. Mivavaka Aminao aho, Ray, mba hanamasina ny divay ho an'izany tanjona izany. Mamelà ny fahotanay tsirairay. Ary enga anie ny olona tsirairay izay mandray an'ity divay ity ao amin'ny vatany, enga anie izy ireo hanana fahasalamana, tanjaka, ary famonjena avy Aminao. Ekeo izany, Tompo. Mangataka an'izany amin'ny Anaran'i Jesosy izahay. Amena.

¹⁴⁸ Ny Baiboly dia nilaza fa rehefa namaky ny mofo Izzy ka nitso-drano an'izany, dia nanao hoe, "Raiso ka hano, ity No Tenako izay novakina ho anareo. Ataovy izao ho fahatsiarovana Ahy." Ary rehefa mandray an'ireto silaka mofo kely ireto isika, an'ny kosher, izay namboarina tsy nisy masirasira, namboarin'ireo Kristiana izy, namboarina izany satria izy—izy dia maneho ny Tenan'i Kristy. Azontsika fa—fa tamin'ny andron'ny mpianatr'i Kristy izany, na ny andron'ny fiangonana, izay naka an'ireto ampahany ireto ary nanao ny sakafo hariva ho vonona tamin'ilay sakafo hariva farany, sakafo hariva farany an'i Kristy. Ary manerana ny Baiboly, dia ireo mpianatra no nanolotra an'ireo zavatra ireo ho an'ny olona. Ary androany, ireo mpianatra antsika an'ny andro moderina, ireo rahalahintsika eto amin'ny fiangonana, ireo mpianatr'ity Antony ity, no manolotra ho an'ny

olona. Ary haka an'ireto ampahany ireto izy ireo ka hanome azy ireo ho an'ny olona.

¹⁴⁹ Ary ankehitriny rehefa mandray an'ity mofo ity ianareo, dia tsarovy, fa maneho an'ilay Zanak'ondry izany. Taona maro lasa izay rehefa natsatsika tamin'ny afo ny zanak'ondrin'ny Isirael, ary nalaina niaraka tamin'ny zava-maitso mangidy, dia natanjaka ny olona; tsy simba mihitsy ny kiraron'izy ireo, tsy lasa tonta mihitsy ny akanjon'izy ireo, nandrity ny dia rehetra mandra-pahatratran'izy ireo ny taniny nampanantenaina. Enga anie Andriamanitra hihazona antsika ho salama, sambatra, manompo Azy mandra-pahatratrantsika an'ilay Tany Nampanantenaina izay Nomeny antsika.

Ndao isika hivavaka.

¹⁵⁰ Ray any an-danitra Mpiahys, raha niresaka aho izao hariza izao an'ilay Vatan'ny Tomponay Masina, nohamasinina, izay ao Aminy no hitoeran'ny fahafenoan'ny maha-Andriamanitra, rehefa mieritreritra an'io Vatana izay nivalombalona sy—sy novakiana io aho, ary ilay Rà nandriaka, ny Lamosiny sy ny Taolan-tehezany nivoaka nangirana, ny dian-kapoky ny karavasy teo amin'ny Lamosiny ambony sy ambany, rehefa mieritreritra an'ity mofo mikentrona, nokapohina ity aho izay maneho an'izany, dia tonga ao am-ponay indray izany, mametraka ny fonay izahay, Tompo, eo ambonin'ny Alitaranao izao hariva izao. Mamelà anay, O Andriamanitra. Ary enga anie ity mofo novakina ity, raha miditra eo am-bavan'izy ireo izany, ireo Mpanomponao, ary enga anie izy ireo hahafantatra fa izany No Vatanao sarobidy izay notorotoroina sy voalefona, ary tamin'ny dian-kapoka no nahasitranana anay. Ekeo izany, Tompo. Hamasino ity mofo kosher ity ho an'ny tanjona kendreny. Mangataka an'izany amin'ny Anaran'i Jesosy izahay. Amená.

Andraso iray minitra fotsiny.

¹⁵¹ Tsy fandraisana mikatona izao. Ny mpino Kristiana tsirairay dia tongasoa eto amin'ny latabatry ny Tompo, mba hanana an'ity fiombonana ity miaraka aminay . . . ? . . .



ILAY FANALAHIDY HO AN'ILAY VARAVARANA MAG62-1007
(The Key To The Door)

Ity Hafatr'i Rahalahy William Marrion Branham ity, izay notoriana tamin'ny Teny Anglisy ny Alahady hariva, 7 Oktobra, 1962, tao amin'ny Branham Tabernacle ao Jeffersonville, Indiana, U.S.A., dia nalaina avy tamin'ny horonam-peo ary natonta manontolo amin'ny Teny Anglisy. Ity fandikana amin'ny Teny Malagasy ity dia natonta sy nozarin'ny Voice Of God Recordings.

MALAGASY

©2020 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Filazana fahefan'ny tompon'ny boky

Tsy azo adika. Ity boky ity dia azo atao printy amin'ny fanaovam-printy ao an-trano ho an'ny fampiasana manokana na ho zaraina, tsy misy sarany, ho fitaovana iray hanaparitahana ny Filazantsaran'i Jesosy Kristy. Ity boky ity dia tsy azo amidy, na adika indray amin'ny refy lehibe, na alefa amin'ny siteweb iray, na tehirizina amin'ny fomba nisy nanesorana, na adika amin'ny fiteny hafa, na ampiasaina ho fangataham-bola raha tsy misy alàlana voasoratra mazava avy amin'ny Voice Of God Recordings®.

Ho an'ny fanazavana fanampiny na ho an'ny fitaovana hafa efa azo raisina, dia iangaviana hifandray amin'ny:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org